

唐詩紀事



唐詩紀事卷第三十六

黎逢

閻濟美

裴交泰

劉阜

黎逢

小苑東望宮池柳色詩云上林新柳變小苑暮天晴始望和煙密遙憐拂
水輕色承陽氣暖陰帶御溝清不厭隨風弱仍宜向日明垂絲徧閣榭飛
絮觸簾旌漸到依依處思聞出谷鶯
韋蘇州任京兆工曹日有答貢士黎逢詩云彌月曠不接公門但驅馳蘭
章忽有贈馳用慰所思不見心尙密況當相見時

逢氣貌山野及第年初場後至便於簾前設席主司異之謂其生疎必謂
文詞稱是專令人伺之句句來報初問云何人徘徊日亦是常言既而將
及數聯莫不驚嘆遂擢第

逢登大曆十二年進士第

閻濟美

濟美大曆九年春下第將出關獻座主張謂詩六韻曰謇謬王臣直文明
雅量全望鑑金自躍應物鏡何偏南國幽沈盡東堂禮樂宣轉令遊藝士
更惜至公年芳樹歡新景青雲泣暮天唯愁鳳池拜孤賤更誰憐謂覽之
問失第之因具以實告謂深有遺才之嘆乃曰所投六韻必展後效明年
濟美自江東繼薦就試東都謂復主文雜文已過繼欲帖經濟美辭以不
能謂曰禮闈故事亦許作詩贖帖遂命天津橋望洛城殘雪題濟美曰新
霽洛城端千家積雪寒未收清禁色偏向上陽殘既而日勢已晚詩未就
謂云只據見在將來一覽稱賞遂唱過盧景莊謂曰前足下試蜡日祈天
宗賦以魯丘對衛賜則子貢也乃作駟誤矣方悔之明日謂曰天寒急景
諸君文卷不成未可以呈宰相請重錄送納既而索舊卷則駟字上朱點
在焉易卷之意蓋有在也到闕謂捐濟美曰前日春閒遺才所投六韻不
敢暫忘幸副素懷矣濟美紀其事曰前朝公相許與定分一面不忘美哉
濟美貞元末歷福建觀察爲治簡易以工部尙書卒

濟美元和初刺華州劾華陰令柳澗賊罪韓愈使過華上疏理澗留中不下詔御史按得澗賊狀以愈妄論復爲國子博士

裴交泰

長門怨云自閉長門經幾秋羅衣溼盡淚還流一種蛾眉明月夜南宮歌吹北宮愁范攄曰近日舉場詩尤新章孝標對月云長安一夜千家月幾處笙歌幾處愁有類乎裴交泰

裴貞元閒詩人

劉阜

長門怨云宮殿沈沈月色分昭陽宮漏不堪聞珊瑚枕上千行淚不是思君是恨君

韋莊載阜長門怨云淚滴長門秋夜長愁心和雨到昭陽淚痕不覺君恩斷拭卻千行更萬行

唐詩紀事卷第三十七

元稹

稹爲御史奉使東川于褒城題黃明府詩其序云昔年曾于解縣飲酒余爲觥錄事嘗于竇少府廳有一人至頻犯語令連飛十數觥不勝因逃去醒後問人前虞鄉黃丞也此後絕不復知元和四年三月奉使東川十六日至褒城驛逡巡有黃明府見迎瞻其形容髣髴似識問其前銜卽曩日逃席黃丞也說向前事黃生惘然而悟因饋酒一罇艤舟請余同載余不免其意與之盡歡徧問褒陽山水則褒姒所奔之城在其左諸葛所征之路次其右感今懷古作贈黃明府詩曰昔年曾痛飲黃令困飛觥席上當時走馬前今日迎依稀迷姓字積漸識平生故友身皆遠他鄉眼暫明便邀連榻坐兼共榜船行酒思臨風亂霜稜拂地平不看深淺酌貪愴古今情迤邐七盤路坡陀數丈城花疑褒女笑棧想武侯征一種埋幽石空聞千載名出本事詩

稹聞西蜀薛濤有辭辨及爲監察使蜀以御史推鞫難得見焉嚴司空潛知其意每遣薛往泊登翰林以詩寄曰錦江滑膩峨眉秀生得文君與薛濤言語巧偷鸚鵡舌文章分得鳳凰毛紛紛辭客多停筆箇箇公侯欲夢刀別後相思隔煙水菖蒲花發五雲高後廉問濶東乃有劉探春自淮甸而來容華莫比元贈詩曰新妝巧樣畫雙蛾慢裹常州透額羅正面偷勻光滑笏緩行輕踏皺紋波言辭雅措風流足舉止低回秀媚多更有惱人腸斷處選詞能唱望夫歌望夫歌者卽羅噴之曲也元在濶河七年因醉題東武其詩曰役役行人事紛紛碎簿書功夫兩衙盡留滯七年餘病痛梅天發親情海岸疎因循未歸得不是憶鱸魚盧侍郎簡求戲曰丞相雖不爲鱸魚爲好鏡湖春色耳謂探春也

公先娶京兆韋氏字蕙叢韋逝爲詩悼之曰曾經滄海難爲水除卻巫山不是雲出本事詩

稹元和四年爲御史鞫獄梓潼樂天昆仲送至城西而別後旬日昆仲與

李侍郎建閒遊曲江及慈恩寺飲酣作詩曰花時同醉破春愁醉折花枝
作酒籌忽憶故人天際去計程今日到梁州後旬日得元書果以是日至
褒仍寄詩曰夢君兄弟曲江頭也到慈恩院院遊驛吏喚人排馬去忽驚
身在古梁州千里魂交合若符契白有感夢記備敘其事

稹以明經制策入仕其一篇自述曰延英引對碧衣郎江硯宣毫各別牀
天子下簾親考試宮人手裏過茶湯是時貴族竝應制科用爲男子榮進
連昌宮詞云連昌宮中滿宮竹歲久無人森似束又有牆頭千葉桃風動
落花紅款款宮邊老人爲余泣小年選進因曾入上皇正在望仙樓太眞
同凭欄干立樓上樓前盡珠翠炫轉熒煌照天地歸來如夢復如癡何暇
備言宮裏事初過寒食一百六店舍無煙宮樹綠夜半高樓絃索鳴賀老
琵琶擅場屋力士傳呼覓奴念奴潛伴諸郎宿須臾覓得又連催特勅
街中許然燭春嬌滿眼垂紅綃掠削雲鬢旋妝束飛上九天歌一聲二十
五郎吹管逐逡巡大徧梁州徹色色龜茲轟錄續李謩壓笛傍宮牆偷得

新翻數般曲平明大駕發行宮萬人歌舞途路中百官隊仗避岐薛楊氏
諸姨車鬪風明年十月東都破御路猶存祿山過驅令供頓不敢藏萬姓
無聲淚潛墮兩京定後六七年卻尋家舍行宮前莊園燒盡有枯井行宮
門圍樹宛然爾後相傳六皇帝不到離宮門久閉往來年少說長安玄武
樓前華萼廢去年敕使因斫竹偶值門開暫相逐荆榛櫛比塞池塘狐兔
驕癡緣樹木舞榭欹傾基尙存文牕窈窕紗猶綠塵埋粉壁舊花鈿鳥啄
風箏碎珠玉上呈偏愛臨砌花依然御榻臨階斜蛇出鷲巢盤鬪棋菌生
香桮正當衙寢殿相連端正樓太真梳洗樓上頭晨光未出簾影黑至今
反掛珊瑚鉤指向傍人因慟哭卻出宮門淚相續自從此後還閉門夜夜
狐狸上門屋我聞此語心骨悲太平誰致亂者誰翁言野父何分別耳聞
眼見爲君說姚崇宋璟作相公勸諫上皇言語切燮理陰陽禾黍豐調和
中外無兵戎長官清平太守好揀選皆言由至一作相公開元欲末姚宋死
朝廷漸漸由妃子祿山宮中養作兒虢國門前鬧如市弄權宰相不記名

依稀憶得楊與李廟謀顛倒四海搖五十年來作瘡痂今皇神聖丞相明
詔書纔下吳蜀平官軍又取淮西賊此賊亦除天下寧年年耕種宮前道
今年不遣子孫耕老翁此意深望幸努力廟謀休用兵

穆宗時嬪御多誦稹歌宮中號爲元才子後荆南監軍崔峻歸朝出稹連
昌宮詞等百餘篇奏御穆宗大悅卽日拜祠部郎中知制誥稹上令狐文
公書云某始自御史府謫官于外十餘年矣閒誕無事遂用力于詩章日
益月滋有詩千餘首其閒感物寓意可備矇眊之風達者有之詞真氣麤
罪戾是懼固不敢陳露于人惟杯酒光景閒屢爲小碎篇章以自吟暢然
以爲律體卑下格力不揚苟無姿態則陷流俗常欲得思深語近韻律調
新屬對無差而風情自遠然而病未能也江湖閒多有新進小生不知天
下文有宗主妄相倣效又從而失之遂至有褊淺之調皆目爲元和詩體
某又與同門生白居易友善居易雅能爲詩就中愛驅駕文字窮極聲韻
或爲千言或爲五百言律詩以相投寄小生自審不能有以過之往往戲

排舊韻別創新詞名爲次韻蓋欲以難相挑耳江湖閒爲詩者或相倣倣或力不足則至于顛倒語言重複首尾韻同意等不異于篇亦目爲元和體而司文者考變異之由往往歸咎于某嘗以爲雕蟲小事不足自明也樂天在洛太和中禳拜左丞相自越過洛以二詩別樂天云君應怪我留連久我欲與君辭別難白頭徒侶漸稀少明日恐君無此歡又云自識君來三度別這回白盡老髭鬚戀君不去君須會知得後迴相見無未幾死于鄂樂天哭之曰始以詩交終以詩訣茲筆相絕其今日乎

屈指貞元舊朝士幾人同見太和春

感興句

兒歌楊柳葉妾拂石榴花

句遠

路事無限相逢惟一言月色照榮辱長安千萬門

逢白公句

右張爲取作主客

圖

稹序言寄樂天云九歲學賦詩長者往往驚其可教年十五六粗識聲病時貞元十年已後德皇帝春秋高理務用人最不欲文法吏生天下罪過外闡節將動十餘年不許相朝死于其地不易者十八九而又將豪卒悞

之處因喪負衆橫相賊殺告變絡繹使者迭窺旋以狀聞天子曰某邑將
某能遏亂亂衆寧附願爲其帥名爲衆情其實逼詐因而可之者又十八
九前置介倅因緣交授者亦十四五由是諸侯敢自爲旨意有羅列兒孫
以自固者有開導蠻夷以自重者甚者視一境如一室刑殺其下不啻六
畜厚加剝奪名爲進奉其實貢入之數百一焉京城之中停第邸店以曲
巷斷侯甸之內水陸腴沃以鄉里計其餘奴婢資財生生之備稱是朝廷
大臣以謹慎不言爲樸雅以時進見者不過一二親信直臣義士往往抑
塞禁省之間或繕完隕墜豪家大帥乘聲相扇延及老佛土木妖熾習俗
不怪上不欲令有司備官闈中小碎須求往往持幣帛以易餌餅吏緣其
端剽奪百貨勢不可禁僕時孩騃不慣聞見獨于書傳中初習理亂萌漸
心體悸震若不可活思欲發之久矣適有人以陳子昂感遇詩相示吟翫
激烈卽日爲寄思玄子詩二十首故鄭京兆于僕爲外諸父深賜憐獎因
以所賦呈獻京兆翁深相駭異秘書少監王表在坐顧謂表曰使此兒五

十不死其志義何如哉惜吾輩不見其成就因召諸子訓責泣下僕亦竊不自怠由是勇于爲文又久之得杜甫詩數百首愛其浩蕩津涯處處臻到始病沈宋之不存寄興而訝子昂之未暇旁備矣不數年與詩人楊巨源友善日課爲詩性復僻懶人事常有閒暇閒則有作識足下時有詩數百篇矣習慣性靈遂成病蔽每公私感憤道義激揚朋友切磨古今成敗日月遷逝光景舒慘山川勝勢風雲景色當花對酒樂罷哀餘通滯屈伸悲歡合散至于疾恙其身悼懷昔遊凡所對遇異于常者則欲賦詩又不幸年三十二時有罪譴弃今三十七矣五六年閒是丈夫心力壯時常在閒處無所役用性不近道未能淡然忘懷又復懶于他欲全盛之氣注射語言雜揉精粗遂成多文然亦未嘗繕寫適值河東李明府景儉在江陵時僻好僕詩章謂爲能解欲得盡取觀覽僕因撰成卷軸其中有旨意可觀而詞近往古者爲古諷意亦可觀而流在樂府者爲樂諷詞雖近古而止于吟寫情性者爲古體詞實樂流而止于模象物色者爲新題樂府聲

勢沿順屬對穩切者爲律詩仍以七言五言爲兩體其中有稍存寄興與
諷爲流者爲律諷不幸少有伉儷之悲撫存感往成數十詩取潘子悼亡
爲題又有以干教化者近昵婦人暈淡眉目綰約頭髮衣服修廣之度及
匹配色澤尤極怪豔因爲豔詩百餘首詞有今古又兩體自十六時至是
元和七年矣有詩八百首色類相從共成十體凡二十卷自笑冗亂亦不
復致之于行李昨來京師偶在箱篋及通行盡置足下僅亦有說僕聞上
士立德其次立事不遇立言凡人急位其次急利下急食僕天與不厚既
乏全然之德命與不遇未遭可爲之事性與不惠復無垂範之言兀兀狂
癡行近四十徼名取位不過于第八品而冒憲已六七年授通之初有翫
通之熟者曰地溼墊卑編人士稀少近歲荒札死亡過半邑無吏市無貨
百姓茹草木刺史以下計粒而食大有虎豹蛇虺之患小有蝮蝥浮塵蜘蛛
之類皆能鑽嚙肌膚使人瘡痂夏多陰淫秋爲痢瘡地無醫巫藥石萬
里病者有百死一生之慮何僕之命不厚也如此智不足也又如此其所

詣之憂險也又復如此則安能保持萬全與足下必復京輦以須他日立
言立事之驗耶但恐一旦與急食者相扶而終使足下受天下友不如己
之誚是用悉所爲文留穢箱笥比夫格弈樗塞之戲乎昨行巴南道中又
有詩五十一首文書中得七年已後所爲向二百篇繁亂冗雜不復置之
執事前所寄思玄子者小歲爲文不能自足其意貴其起予之始且志京
兆公見遇之由今亦寫爲古諷之一移諸左右僕少時受吹噓之術于鄭
先生病懶不就今在閒處思欲怡神保和以求其內異日亦不復費詞于
無用之文矣省視之煩庶亦已于是乎

琵琶歌

寄管兒兼誨鐵山此後竝新題樂府

琵琶宮調八十一旋宮三調彈不出玄宗偏許

賀懷智段師此藝還相匹自從流傳指撥哀崑崙善才徒爾爲鴻聲少得

似雷吼

去聲

鷓絃不敢彈羊皮人閒奇事會相續但有卞和無有玉段師弟

子數十人李家管兒稱上足管兒不作供奉兒拋在東都雙鬢絲逢人便
請送杯盞著盡工夫人不知李家兄弟皆愛酒我是酒徒爲密友著作曾

邀連夜宿中輟清溪華新綠平明船載管兒行盡日聽彈無限曲曲名無
限和者鮮霓裳羽衣偏宛轉涼州大徧最豪嘈綠腰散序多籠撚我聞此
曲深賞奇賞著奇處驚管兒管兒爲我雙淚垂自彈此曲長長悲淚垂桿
撥朱絃溼冰泉鳴咽流鶯澁因茲彈作雨霖鈴風雨蕭條鬼神泣一彈既
罷又一彈珠幢夜靜風珊珊低回慢弄關山思坐對燕然秋月寒月寒一
聲深殿磬驟彈曲破音繁併百萬金鈴旋去聲玉盤醉客滿船皆暫醒自茲
聽後六七年管兒在洛我朝天遊想慈恩杏園裏夢寐仁風花樹前去年
御史留東臺公私蹙促顏不開今春制獄正撩亂晝夜推囚心似灰暫輟
歸時尋著作著作南園花折萼煙支耀眼桃正紅雪片滿溪梅已落是夕
青春值三五花枝向月雲吞吐著作施罇命管兒管兒久別今方覩管兒
還爲彈綠腰綠腰依舊聲迢迢猿鳴雪岫來三峽鶴唳晴空聞九霄逡巡
彈得綠腰徹霜刀破竹無殘節幽關鷓鴣軋胡雁悲斷絃春驕層冰裂我爲
含淒歎奇絕許作是歌始終說藝奇思寡塵事多許來寒暑又經過如今

左降在閒處始爲管兒歌此歌寄管兒管兒憂爾衰爾衰之後繼者誰繼之無乃在鐵山鐵山已近曹穆閒二善才性靈甚好功猶淺急處未得

臻幽閒努力鐵山勤學取莫遣後來無所祖

何滿子歌

張湖南座爲唐有態作

何滿能歌能宛轉天寶年中世稱罕嬰刑繫在囹

圜閒下調哀音歌憤懣梨園弟子奏玄宗一唱承恩羈網緩便將何滿爲

曲名御譜親題樂府纂魚家入內本領絕葉氏有年聲氣短自外徒煩記

得詞點拍纔成已夸誕我居湖外拜君侯正值灰飛仲春瑄廣宴江亭爲

我開紅妝遲日花枝暖此時有態踏華筵未吐芳詞貌夷坦翠蛾轉盼搖

雀釵碧袖歌垂翻鶴卵定面凝眸一聲發雲停塵下何勞算迢迢擊磬遠

玲玲一一貫珠勻款款泛羽含商移調態留情度意拋絃管湘妃寶瑟水

上來秦女玉簫空外滿纏綿疊破最慙慙整頓衣裳事閒散水含遠溜咽

還通鶯泥晚花啼漸嬾斂黛吞聲若自冤鄭袖見指西子浣陰山鳴雁曉

斷行巫峽哀猿夜呼伴古者諸侯饗外賓鹿鳴三奏陳圭瓚何如有態一

曲終牙籌記令紅螺盞

五絃彈云趙璧五絃彈徵調徵聲嶢絕何清峭辭雄皓鶴警露啼失子哀
猿繞林嘯風入春松正凌亂鷲含曉舌憐嬌妙嗚嗚暗溜咽冰泉殺殺霜
刀澁寒鞘促節頻催漸繁撥珠幢斗絕金鈴掉千勒鳴鏑發胡弓一片清
球擊虞廟衆樂雖同第一部德宗皇帝常偏召旬休節假暫歸來一聲狂
殺長安少主第侯家最難見按蘇雷反歌按曲皆承詔水精簾外教貴嬪璫
瑁筵心伴中要臣有五賢非此絃或在拘囚或屠釣一賢得進勝累百兩
賢得進同周召三賢仕漢滅暴強四賢鎮岳寧邊徼五賢竝用調五常五
常既序三光耀趙璧五絃非此賢九九何勞設庭燎

放言五首云近來逢酒便高歌醉舞詩狂漸欲魔五斗解醒猶恨少十分
飛盞未嫌多眼前讐敵都休問身外功名一任他死是等閒生也得擬將
何事奈吾何其一莫將心事厭長沙雲到何方不是家酒熟舖糟學漁父飯
來開口似神鷄竹枝得鳳千莖直柳樹迎風一向斜總被天公霑雨露等

頭成長盡生涯其二霆轟電熒數聲頻不奈狂夫不藉身縱使被雷燒作燼

寧殊埋骨颺爲塵得成蝴蝶尋花樹儻化江魚掉錦鱗必若乖龍在渚處

何須警動自來人其三安得心源處處安何勞終日望林巒玉英惟向火中

冷蓮葉元來水上乾寧戚飯牛圖底事陸通歌鳳也無端孫登不語啟期

樂各自當情各自歡其四三十年來世上行也曾狂走趁浮名兩迴左降須

知命數度登朝何處榮乞我杯中松葉滿遮渠肘上柳枝生他時定葬燒

缸地賣與人家得酒盛其五

和樂天過秘閣書省舊廳云聞君西省重徘徊秘閣書房次第開壁記欲

題三徧合吏人驚問十年來經排蠹簡憐初校芸長陳根識舊栽司馬見

詩心最苦滿身蚊蚋笑煙埃

和樂天贈楊秘書云昔與楊郎在帝城搜天降地覓詩情曾因竝句甘稱

小不爲論年便喚兄刮骨直穿猶苦鬪夢腸翻出暫閒行因君投贈還相

和老去那能競底名

琵琶云學語胡兒撼玉鈴甘州破裏最星星使君自恨常多事不得工夫
夜夜聽

內狀詩寄楊白二員外制時知天門暗闢玉錚鐃書送中樞曉禁清彤管內

人書細膩金奩御印篆分明衝街不避將軍令跋勅兼題宰相名南省郎

中誰得詔與君將向世閒行

酬樂天餘思不盡加為六韻之作律呂同聲我愛身文章君是一伶倫衆

推賈誼為才子帝喜相如作侍臣次韻千言曾報答樂天會寄予千字律

皆用本韻酬和直詞三道共經綸樂天與予元詩駁雜真難辨後輩好偽作予到

處云是予所撰寫宮詞百篇及新白樸流傳用轉新樂天于翰林中書取

詩兩卷及手勘驗無一篇是者蔡女圖書雖在日蔡琰口誦家于公門戶

學式禁中號曰白樸每有新入

豈生塵商瞿老去猶希冀把籛金便付人

寄浙西李大夫四首云柳眼梅心漸欲春白頭西望憶何人金陵太守曾

相伴共踏銀臺一路塵又云藥珠深處少人知網索西臨大液池洛殿曉

聞天語後步廊騎馬笑相隨

網索在太液上學士候對歌於此

又云禁林同直話交情無

夜無曾不到明最憶西樓人鏡後玉晨鐘磬兩三聲

玉晨觀在紫宸殿後面

又云由

來鵬化便圖南浙右雖雄我未甘早渡西江好歸去莫拋舟楫滯春潭

微之善紀事如臺中鞫獄贈周兄詩云鬧裝轡頭觸靜拭腰帶斑鶴子繡

線鞞狗兒金油

去

又坐臥摩錦褥捧擁緜絲鬢罰俸西歸詩邀我上華

筵橫頭坐賓位那知我年少深解酒中事能唱犯聲歌偏精變籌義含詞

徒殘拍促舞遞繁吹叫噪擲投盤生獰攝觥使寄吳士矩云予時最年少

專務酒中職未媿解生獰偏務任狂直曲庇桃根蓋橫講捎雲式亂布鬪

分明惟新聞讒慝恥作最先吐羞言未朝食酬東川李相公云昔附赤霄

羽葳蕤遊紫垣鬪班香案上奏語玉晨尊酬白學士云竝入紅蘭署偏親

白玉規又鬪班雲湧開扇雉參差又麪梨通蒂朽

無味

火米帶芒炊

笋錢筒束鯁魚箭羽鬻又病賽烏稱鬼巫占瓦代龜

南人賽烏鬼

紀懷贈李雲

云昔冠諸生首初因三道徵公卿碧墀會名姓白麻稱答胡雲之云矮馬

馳鬣韞絳茄牛獸面纓一船席外語三楹拍心精傳盞加分數橫波擲目

成華奴歌淅淅鹽媚子侮卿卿又還坐唯便草投盤漸廢觥又柳愛凌寒

軟梅憐上雪輕又雨催魚火焰風引去竹枝聲店臥戲呈諸公籌筇隨宜

放投盤止罰嗔紅娘留醉打舞引紅娘觥使及醒差酒中觥使又槍旗如

在手籌筇那復敢葳蕤酬樂天東南行云科試銓衡局衙參典校尉書判

校正月中分桂樹天上識菖蒲又白麻雲色膩墨詔電光粗又祖竹蕙新

筒孫枝厭舊梧又酬樂天待漏入閣云未勘銀臺契先排浴殿關沃心因

特召承旨絕常班承旨在上颯閃才人袖宮官嘔鷓軟鑿鑿宮花低作帳雲

從積成山密視樞機草偷瞻咫尺顏恩垂天語近對久漏聲閒丹陛曾同

立金鬢恨獨攀樂天舍人筆無鴻業潤抱愧紫文殷河水通天上瀛洲接

世閒謫仙名籍在何不重來還神麴酒云七月調神麴三春釀綠醅雕鐫

荆玉盞烘透內邱瓶戴光弓詩云潞府筋角勁戴光因合成閒吟云晻淡

洲煙白籬節日腳紅江喧過雲雨船泊打頭風底子收魚市鴉兒噪荻叢

不堪堤上立滿眼是蚊蟲狂醉云崑亭今日顛狂醉舞引紅娘亂打人亞
枝紅云平陽池上亞枝紅桃花平在池上悵望山郵是事同還向萬莖深竹裏一
枝渾臥碧流中

稹在鄂州周復爲從事常酬唱復簪笏見稹曰某偶以大人往還獲一第
其實不能詩賦稹曰質實如是賢于能詩遠矣

一云微之守浙東樂天守蘇臺遞筒唱和內一聯云有月多同賞無杯不
共持兩地暗合

唐詩紀事卷第三十八

白居易

張爲以居易爲廣大教化主取其讀史詩云含沙射人影雖病人不知巧
言誣人罪至死人不疑撥蜂殺愛子掩鼻戮寵姬弘恭陷蕭望趙高謀李
斯陰德旣必報陽禍豈虛施人事雖可罔天道終難欺明卽有刑辟幽卽
有神祇苟免勿私喜鬼得而誅之又取秦中吟云厚地植桑麻所要濟生
民生民理布帛所求活一身身外充征賦上以奉君親國家定兩稅本意
在憂人厥初防其淫明勅內外臣稅外加一物皆以枉法論奈何歲月久
貪吏得因循役我以求寵斂索無冬春織絹未盈疋繰絲未盈斤里胥迫
我納不許慙逡巡歲暮天地閉陰風生破村夜深煙火盡霰雪白紛紛幼
者形不蔽老者體無溫悲喘與寒氣併入鼻頭辛昨日輸殘稅因窺官庫
門繪帛如山積絲絮如雪屯號爲羨餘物隨日獻至尊奪我身上煖買爾
眼前恩進入瓊林庫歲久化爲塵又取寓意云豫章生深山七年而後知

挺高二百尺本末皆十圍天子建明堂此材獨中規匠人執斤墨探度將
有期孟冬草木枯烈火燎于陂狂風吹猛燄從根燒到枝作養二十年方
成棟梁姿一朝爲灰燼柯葉無子遺地雖生爾材天不與爾時不如糞上
芝猶有人掇之已矣勿重陳重陳令人悲勿悲焚燒苦但悲採用遲又取
赫赫京內史奕奕中書郎昨傳徵拜日恩私固殊常貂冠水蒼玉紫綬黃
金章佩服身未暖已聞竄炎荒親戚不得別吞聲泣路旁賓客亦已散門
前雀羅張富貴來未久倏如瓦溝霜權勢去尤速譬若石火光不如守貧
賤貧賤可久長傳語宦遊子且來歸故鄉又取得意減別恨半酣還遠程
之句又人吏留不得直入故山雲之句又長生不似無生理休向青山學
鍊丹之句又白髮鑷不盡根在愁腸中之句又與薛濤云峨眉山勢接雲
霓欲逐劉郎此路迷若似剡中容易到春風猶隔武陵溪

已上皆
主客圖

序洛詩序云序洛詩樂天自敘在洛之樂也予歷覽古今歌詩自風騷之

後蘇李以還

李陵蘇武
爲五言詩

次及鮑謝徒迄于李杜輩其閒詞人聞知者累百

詩章流傳者鉅萬觀其所自多因讒譴逐征戍行旅凍餒病老存歿別離情發于中文形于外故憤憂怨傷之作通計古今十八九焉世所謂文士多數奇詩人尤命薄于斯見矣又有以知理安之世少離亂之時多亦明矣予不佞喜文嗜詩自幼及老著詩千首已甚多矣故章句在人口姓字落詩流雖才不逮古人然所作不啻數千百首作一數奇命薄之士亦有餘矣今壽過耳順幸無病苦官至三品免罹飢寒此一樂也太和二年詔授刑部侍郎明年就領河南尹事又三平病免歸履道里第再授賓客分司自三年春至八年夏至洛凡五周年作詩四百三十二首除喪明哭子十三篇外其他皆寄懷于酒或取意于琴閒適有餘酣樂不暇苦詞無一字憂歎無一聲豈牽強所能致耶蓋亦發中而形外耳斯樂也實本之於省分知足濟之以家給身閒文之以觴詠絃歌飾之以山水風月此而不適何往而適哉茲又以重吾樂也予嘗云治世之音安以樂閒居之詩泰以適苟非理世安得閒居故集洛詩別爲序引不獨記東都履道里有閒

居秦適之叟亦欲知皇唐太和歲有理世安樂之音集而序之以俟夫採詩者甲寅歲七月十二日云爾

元微之長慶集序云憲宗皇帝冊召天下士樂天對詔稱旨又登甲科未幾入翰林掌制誥比尙書言得失因爲賀雨詩秦中吟等數十章指言天下事時人比之風騷焉予始與樂天同校祕書前後多以詩章相贈答會予譴掾江陵樂天猶在翰林寄予百韻律詩及雜體前後數十章是後各佐江通復相酬寄巴蜀江楚閒泊長安中少年遞相倣效競作新詞自謂爲元和詩而樂天秦中吟賀雨諷諭等篇時人罕能知者然而二十年閒禁省觀寺郵候牆壁之上無不書王公妾婦牛童馬走之口無不道至於繕寫模勒街賣於市井或持之以交酒茗者處處皆是

揚越閒多作書模勒樂天及余雜詩

賣於市肆之中也

其甚者有至於盜竊名姓苟求自售雜亂閒廁無可奈何予嘗

於平水市中

鏡湖傍草市名

見村校諸童競習詩召而問之皆對曰先生教我樂

天微之詩固亦不知予之爲微之也又云雞林賈人求市頗切自云本國

宰相每以百金換一篇其甚僞者宰相輒能辨別之自篇章以來未有如是流傳之廣者長慶四年樂天自杭州刺史以右庶子詔還予時刺會稽因得盡徵其文手自排纘成五十卷凡二千一百九十一首前輩多以前集中集爲名予以爲陛下明年秋當改元長慶於是因號曰白氏長慶集大凡人之文各有所長樂天之長可以爲多矣夫以諷諭之詩長於激閒適之詩長於遣感傷之詩長於切五字律詩百言而上長於瞻五字七言百言而下長於情賦贊箴戒之類長於當碑記敘事制誥長於實啟奏表狀長於直書檄詞策剖判長於盡總而言之不亦多乎哉至於樂天之官族景行與予之交分淺深非敘文之要也故不書

與元九書云夫文尙矣三才各有文天之文三光首之地之文五材首之人之文六經首之就六經言詩又首之何者聖人感人心而天下和平感人心者莫先乎情莫始乎言莫切乎聲莫深乎義詩者根情苗言華聲實義上自賢聖下至愚駮微及豚魚幽及鬼神羣分而氣同形異而情一未

有聲入而不應情交而不感者聖人知其然因其言經之以六義緣其聲
緯之以五音五音韻義有類韻協則言順言順則聲易入類舉則情見情
見則感易交於是乎孕大含深貫微洞密上下通而一氣泰憂樂合而百
志熙五帝三皇所以直道而行垂拱而理者揭此以爲大柄決此以爲大
寶也故聞元首明股肱良之歌則知虞道昌矣聞五子洛汭之歌則知夏
政荒矣言者無罪聞者作戒言者聞者莫不兩盡其心焉洎周衰秦興採
詩官廢上不以詩補察時政下不以歌導洩人情乃至於諂成之風動救
失之道毀于時六義始刊矣國風變爲騷辭五言始於蘇李蘇李騷人皆
不遇者各繫其志發而爲文故河梁之句止於傷別澤畔之吟歸於怨思
彷徨抑鬱不暇及他耳然去詩未遠梗槩尙存故興離別則引雙鳧一雁
爲喻諷君子小人則引香草惡鳥爲比雖義類不具猶得風人之什二三
焉于時六義始毀矣晉宋以還得者蓋寡以康樂之奧博多溺於山水以
淵明之高古偏放於田園江鮑之流又狹於此如梁鴻五噫之例者百無

一二焉於時六義寢微矣陵夷至於梁陳閒率不過嘲風雪弄花草而已噫風雪花草之物三百篇中豈捨之乎顧所用何如耳設如北風其涼假風以刺威虐也雨雪霏霏以愍征役也棠棣之華感華以諷兄弟也采采芣苢美草以樂有子也皆興發於此而義歸於彼反是者可乎哉然則餘霞散成綺澄江淨如練離花先委露別葉乍辭風之什麗則麗矣吾不知其所諷焉故僕所謂嘲風雪弄花草而已于時六義盡去矣唐興二百年閒其閒詩人不可勝數所可舉者陳子昂有感遇詩二十首鮑防有感遇詩十五首又詩之豪者世稱李杜之作才已奇矣人不逮矣索其風雅比興十無一焉杜詩最多可傳者千餘篇至於貫穿今古翾縷格律盡工盡善又過於李然撮其新安吏石壕吏潼關吏塞蘆子留花門之章朱門酒肉臭路有凍死骨之句亦不退三四十首杜尙如此況不逮杜者乎僕嘗痛詩道崩壞忽忽憤發或食輟哺夜輟寢不量材力欲扶起之嗟乎事有大謬者又不可一二而言然亦不能不羈陳于左右僕始生六七月時乳

母抱弄於書屏下有指無字之字示僕者僕雖口未能言心已默識後有問此二字者雖百十其試而指之不差則僕宿昔之緣已在文字中矣及五六歲便學爲詩九歲諳識聲韻十五六始知有進士苦節讀書二十已來晝課賦夜課書閒又課詩不遑寢息矣以至於口舌成瘡手肘成胝既壯而膚革不豐盈未老而齒髮早衰白瞥瞥然如飛蠅垂珠在眸子中也動以萬數蓋以苦學力文所致又自悲矣家貧多故二十七方從鄉試既第之後雖專於科試亦不廢詩及授校書郎時已盈三四百首或出示交友如足下輩見皆謂之工其實未窺作者之域耳自登朝來年齒漸長閱事漸多每與人言多詢時務每讀書史多求理道始知文章合爲時而著歌詩合爲事而作是時皇帝初卽位宰輔有正人屢降璽書訪人急病僕當此日擢在翰林身是諫官手請諫紙啟奏之外有可以救濟人病裨補時闕而難於指言者輒詠歌之欲稍稍遞進聞於上上以廣宸聰副憂勤次以酬恩獎塞言責下以復吾平生之志豈圖志未就而悔已生言未聞

而謗已成矣又請爲左右終言之凡聞僕賀兩詩而衆口籍籍已謂非宜矣聞僕哭孔戡詩衆面脈脈盡不悅矣聞秦中吟則權豪貴近者相目而變色矣聞樂遊園寄足下詩則執政柄者扼腕矣聞宿紫閣村詩則握軍要者切齒矣大率如此不可徧舉不相與者號爲沽名號爲詆訐號爲訕謗苟相與者則如牛僧孺之戒焉乃至骨肉妻孥皆以我爲非也其不我非者舉不過三兩人有鄧魴者見僕詩而喜無何而魴死有唐衢者見僕詩而泣未幾而衢死其餘則足下又十年來困躓若此嗚呼豈六義四始之風天將破壞不可支持耶抑又不知天之意不欲使下人之病苦聞於上耶不然何有志於詩者不利若此之甚也然僕又自思關東一男子耳除讀書屬文外其他懵然無知乃至書畫棊博可以接羣居之歡者無一通曉其愚拙可知矣初應進士時中朝無總麻之親達官無半面之舊策蹇步於利足之途張空拳於戰文之場十年之間三登科第名入衆耳迹升清貴出交賢俊入侍冕旒始得名於文章終得罪於文章亦其宜也日

者又聞親友閒說禮吏部舉選人多以僕私試賦判傳爲準的其餘詩句亦往往在人口中僕慙然自愧不之信也及再來長安又聞有軍使高霞寓者欲聘娼妓妓大誇曰我誦得白學士長恨歌豈同他妓哉由是增價又足下書云到通州日見江館柱閒有題僕詩者復何人哉又昨過漢南日適遇主人集衆樂娛他賓諸妓見僕來指而相顧曰此是秦中吟長恨歌主耳自長安抵江西三四千里凡鄉校佛寺逆旅行舟之中往往有題僕詩者士庶僧徒孀婦處女之口每每有詠僕詩者此誠雕蟲之戲不足爲多今時俗所重正在此耳雖前賢如淵雲者前輩如李杜者亦未能忘情於其閒古人云名者公器不可以多取僕是何者竊時之名已多既竊時名又欲竊時之富貴使已爲造物者肯兼與之乎今之述窮理固然也況詩人多蹇如陳子昂杜甫各授一拾遺而迺剝至死李白孟浩然輩不及一命窮悴終身近日孟郊六十終試協律張籍五十未離一太祝彼何人哉彼何人哉況僕之才又不逮彼今雖謫在遠郡而官品至第五月俸

四五萬寒有衣飢有食給身之外施及家人亦可謂不負白氏之子矣微之微之勿念我哉僕數月來檢討囊篋中得新舊詩各以類分分爲卷首自拾遺來凡所適所感關於美刺興比者又自武德訖元和因事立題題爲新樂府者共一百五十首謂之諷諭詩又或退公獨處或移病閒居知足保和吟翫情性者一百首謂之閒適詩又有事物牽於外情理動於內隨感遇而形於歎詠者一百首謂之感傷詩又有五言七言長句絕句自一百韻至兩韻者四百餘首謂之雜律詩凡爲十五卷約八百首異時相見當盡致於執事微之古人云窮則獨善其身達則兼濟天下僕雖不肖常師此語大丈夫所守者道所待者時時之來也爲雲龍爲風鵬勃然突然陳力以出時之不來也爲霧豹爲冥鴻寂兮寥兮奉身而退出處何往而不自得哉故僕志在兼濟行在獨善奉而始終之則爲道言而發明之則爲詩謂之諷諭詩兼濟之志也謂之閒適詩獨善之義也故覽僕詩知僕之道焉其餘雜律詩或誘於一時一物發於一笑一吟率然成章非平

生所尚者但以親朋合散之際取其釋恨佐懽今銓次之閒未能刪去他時有爲我編集斯文者略之可也微之夫貴耳賤目榮古陋今人之大情也僕不能遠徵古舊如近歲韋蘇州歌行清麗之外頗近興諷其五言詩又高雅閒澹自成一家之體今之秉筆誰能及之然當蘇州在時人亦未甚愛重必待身後然後人貴之今僕之詩人所愛者悉不過雜律詩與長恨歌已下耳時之所重僕之所輕主於諷諭者意激而言質閒適者思澹而詞迂以質合迂宜人之不愛也今所愛者竝世而生獨足下耳然千百年後安知復無如足下者出而知愛我詩哉故自八九年來與足下小通則以詩相戒小窮則以詩相勉索居則以詩相慰同處則以詩相娛知吾最要率以詩也如今年春遊城南時與足下馬上相戲因各誦新豔小律不雜他篇自皇子陂歸昭國里迭吟遞唱不絕聲者二十里餘樊李在傍無所措口知我者以爲詩仙不知我者以爲詩魔何則勞心靈役聲氣連朝接夕不自知其苦非魔而何偶同人當美景或花時宴罷或月夜酒酣

一詠一吟不知老之將至雖驂鸞鶴遊蓬瀛者之適無以加於此焉又非
仙而何微之微之此吾所以與足下外形骸脫蹤蹟傲軒鼎輕人寰者又
以此也當此之時足下興有餘力且與僕悉索往還中詩取其尤長者如
張十八古樂府李二十新歌行盧楊二祕書律詩竇七元八絕句博搜精
掇編而次之號元白往還詩集衆君子得擬議於此者莫不踴躍欣喜以
爲盛事嗟乎言未終而足下左轉不數月而僕又繼行心期索然何日成
就又可爲之歎息矣又僕嘗語足下凡人爲文私於自是不忍於割戮或
失於繁多其閒妍媸益又自惑必待交友有公鑒無姑息者討論而削奪
之然後繁簡當否得其中矣況僕與足下爲文尤患其多已尙病之況他
人乎今且各纂詩筆粗爲卷第待與足下相見日各出所有終前志焉又
不知相遇是何年相見在何地溘然而至則如之何微之微之知我心哉
潯陽臘月江風苦寒歲暮鮮懽夜長無睡引筆鋪紙悄然燈前有念則書
言無次第勿以繁雜爲倦且以代一夕之話也微之微之知我心哉

按樂天生於代宗大曆七年壬子正月二十日太和七年樂天尹河南元日對酒詩云今朝吳與洛相憶一欣然夢得君知否俱過本命年又詩云何事同生壬子歲老於崔相及劉郎序云余注云余與蘇州劉郎中同生壬子歲今年六十二退之生於大曆三年戊申微之生於德宗建中元年庚申卒於太和五年時年五十三少樂天八歲 德宗貞元十六年己卯中書舍人高郢下及第第四人省試性習相近遠賦玉水記方流詩時年二十八樂天送侯權秀才序云貞元十五年余與侯生俱爲宣城守所貢明年春予中春官第傳云二十七年李商隱銘云年二十六 十七年庚辰試中書判拔萃補校書郎樂天泛渭賦序云右丞相高公之掌貢舉也予以鄉貢進士舉及第左丞相鄭公珣瑜之領選部也予以書判拔萃選登科十九年天子并命二公對掌鈞軸是年齊抗罷崔瑱薨二公入相 憲宗元和元年丙戌四月以賢良方正對策一等冬十二月尉盤屋爲集賢校理賦長恨歌于盤屋是月召入翰林爲學士遷左拾遺 元和二年爲拾遺樂天曲江感秋詩云元和

二年秋我年三十七長慶二年秋我年五十一序云元和二年三年四年予每歲有曲江感秋詩是時予爲左拾遺翰林學士賀雨詩元和三年

冬作諷諭樂府詞元和四年作凡九千二百五十言分爲五十首秦中吟等詩皆拾

遺歲滿當遷憲宗聽自擇官樂天請如姜公輔以學士兼京兆戶曹參軍

以便親養詔可五年以母喪解還有渭上等詩洎效陶淵明詩十六首

七年拜左贊善大夫居昭國里酬張十八訪宿云昔我爲近臣君常稀

到門今我官職冷唯君來往頻又寄元八云進入閣前拜退就廊下餐歸

來昭國里人臥馬歇鞍卻坐至日午起坐心浩然又十年贈杓直云已年

四十四又爲五品官蓋爲贊善大夫首尾四年十年秋或言居易母墜

井死賦新井詩出爲刺史王涯言其不可乃貶江州司馬論盜殺武元衡事宰相嫌其出

位故也樂天東南行一百韻其閒云博望移門籍潯陽佐郡符注云十年春

微之移佐通州其年秋予出佐潯陽十一年賦琵琶行時年四十五矣

詩云行年四十五兩鬢半蒼蒼清瘦詩成癖麤豪酒放狂老來尤委命安

處卽爲鄉或擬廬山下來春結草堂 十二年裴度平淮西 十三年冬

移刺忠州三遊洞庭序云平淮西之明年冬予自江州司馬授忠州刺史

微之自通州司馬授虢州長史又明年春各祇命之郡與知退偕行三月

十一日參會於夷陵又賦詩云澧水店頭春盡日年十送君馬上謫通州夷

陵峽口明月夜此處逢君是偶然一別五年方見面相攜三宿未回船是

也 十五年正月德宗崩穆宗立召爲司馬員外郎是年寒食夜詩云四

十九年身老日一百五夜月明天抱膝思量何事在癡男駮女喚鞦韆又

初除尙書郎脫刺史緋詩云頭白喜拋黃草峽眼明驚拆紫泥書便留朱

紱還銓閣卻着青袍侍玉除是歲下峽目商山路還朝有商山路詩云萬

里路長在六年身始歸所經多舊館大半主人非自十年至是六年矣 明年除主

客郎中知制誥長慶元年以詩贈王十一李七元九王舍人云紫垣曹局

聯華地白鬢郎官老醜時莫怪不如君氣味此中來校十年遲時元微之亦以中人

之薦入爲舍人 是年除中書舍人有絲綸閣下文章靜等詩 長慶二年七月自

舍人旬外出守杭州時河北復亂謀趙國急樂天論事不合乃旬外遷次藍溪詩云既居可言地

願助朝廷理伏閣三上章蠶愚不稱旨聖人存大體優貸容不死鳳詔停

舍人魚書除刺史 長慶三年二月五日杭州花下作云二月五日花如

雪五十二人頭似霜聞有酒時須笑樂不關身事莫思量 長慶四年以

太子左庶子分司東都是歲正月穆宗崩恭宗立三年為刺史無政在人口唯向郡城

中題詩千餘首慙非甘棠詠豈有思人否三年為刺史飲冰復食蘖唯向

天竺山取得兩片石此祇有千金無傷我清白三月作錢塘石湖記時猶在杭州則分司當在秋時

洛中詩云五年職翰林四年蒞潯陽一年巴郡守半年南宮郎二年直綸

閣三年刺史堂凡此十五載有詩千餘章 寶曆元年三月出守蘇州是

年七月有吳郡社名記明年病免華嚴經社名記云寶曆二年九月二十

月恭宗崩樂天欲去郡有自詠五章其一云官舍非我廬官園非我樹洛

中有小宅渭上有別墅既無婚嫁累幸有歸休處歸去誠已遲猶勝不歸

去又宿滎陽詩云生長在滎陽少小辭鄉曲迢迢四十載復到滎陽宿去

時年十二今生五十六

時文宗太和元年也

文宗太和元年以祕書見召十月上

旬誕聖之日樂天以祕書監與沙門義林道士楊洪允發問酬難是歲遷

刑部侍郎微之於浙東就拜尚書樂天詩云我爲憲部入南宮君作尚書

鎮浙東老去一時成白首別來七度換春風是也 二年歲暮詠懷云窮

冬月末兩三日半百年過六七時龍尾趁朝無氣力牛頭參道有心期榮

華物外終須悟老病傍人豈得知猶被妻兒教漸退莫求致仕且分司時

二李黨事興樂天畏禍求退故詠懷云人閒禍福愚難料世上風波老不

禁萬一差池似前事又應追悔不抽簪 三年春移病還東都是年夏得

請爲太子賓客分司

見池上篇序自是不出東都矣

將至東都先寄令狐留守云東都添

箇狂賓客先報壺觴風月知歸履道宅詩云往時多暫住今日是長歸

自是

劉白令狐裴相唱和甚多

四年作自嘲詩云五十八翁方有後靜思堪喜亦堪嗟自

後何處難忘酒不如來飲酒詩篇皆東都作也 五年拜河南尹樂天詩

云六十河南尹前途足可知老應無處避病不與人期是年六十矣 七

年復以賓客分司 序洛詩云太和二年詔授刑部侍郎明年病免歸洛旋以賓客分司居二年就領河南尹事又三年病免歸履道里第再授賓客分司 開成元年起爲同州刺史不拜改太子少傅 二年三月河南

尹李待價禊於洛濱啟留守裴令公公召居易劉禹錫等一十五人宴舟中樂天賦三月草萋萋黃鶯歇又啼之作 四年賦病中詩序云開成已

未歲予蒲柳之年六十有八冬十月甲寅始得風痺之疾因成十五首題爲病中詩且貽所知兼用自廣 五年春盡獨吟云病共樂天相伴坐春

隨樊子一時歸 是年文宗崩武宗立 樂天妓樊素也善歌楊柳枝人多以曲名名之

樂天病去之夢得詩云春盡絮飛留不得隨風好去落誰家 辛酉會昌元年七十以刑部尙書致仕 健哉樂天行云分司東都十三年七旬纔

滿冠已挂又香山寫真贊序云會昌二年罷太子少傅爲白衣居士寫真香山寺藏經臺又初致仕贈留守牛丞相時年七十一則樂天七十致仕

矣致仕詩云南北東西無所羈挂官自在勝分司探花嘗酒多先到拜表

行香盡不知炮笋烹魚飽餐後擁袍枕臂醉眠時報君一語君應笑兼亦無心羨保釐又醉中吟一生耽酒客五度棄官人

注云蘇州刑侍河南尹同州刺史太子少傅皆

免以病

五年爲東都九老會時年七十四 六年八月薨東都贈右僕射

時年七十五樂天寄王起李紳詩云云予與山南王僕射淮南李僕射仕歷五朝年踰三紀海內年輩今唯三人故詩云故交海內只三人二坐巖廊一臥雲時會昌六年也微之卒於太和六年明年崔元亮卒會昌二年劉夢得卒樂天之卒最後

唐詩紀事卷第三十九

韋式

崔玄亮

牛僧孺

李紳

沈傳師

盧羣

劉禹錫

封孟紳

陳潤

韋式

樂天分司東洛朝賢悉會興化亭送別酒酣各請一字至七字詩以題為

韻

王起賦花詩云花點綴分葩露初裊日未斜一枝曲水千樹山家戲蝶未
成夢嬌鶯語更誇既見東園成徑何殊西子同車漸覺風飄輕似雪能令
醉者亂如麻李紳賦月詩云月光耀皎潔輝乾坤靜空關圓滿中秋翫爭
詩哲玉兔鏹難穿桂枝人共折萬象照乃無私瓊臺豈遮君謁抱琴對彈
別鶴聲不得知音聲不切令狐楚賦山詩云山聳峻回環滄海上白雲閒
商老深尋謝公遠攀古巖泉滴滴幽谷鳥關關樹島西連隴塞猿聲南徹
荆蠻世人只向簪裾老芳草空餘麋鹿閒元稹賦茶詩云茶香葉嫩芽慕

唐詩

紀事

卷第三十九

一

無錫丁氏校刊

詩客愛僧家碾雕白玉羅織紅紗銚煎黃蘗色盃轉麴塵花夜後邀陪明月晨前命對朝霞洗盡古今人不倦將知醉亂豈堪誇魏扶賦愁詩云愁迴野深秋生枕上起眉頭闔閣危坐風塵遠遊巴猿啼不住谷水咽還流送客泊舟入浦思鄉望月登樓煙波早晚長羈旅絃管終年樂五侯韋式郎中賦竹詩云竹臨池似玉裊露靜和煙綠抱節寧改貞心自束渭曲種偏多王家看不足仙杖正驚龍化美實當隨鳳熟唯愁吹作別離聲回首駕驂舞陣速張籍司業賦花詩云花落早開賒對酒客興詩家能迴遊騎每駐行車宛宛清風起茸茸麗日斜且願相留懽洽惟愁虛棄光華明年攀折知不遠對此誰能更歎嗟范堯佐道士賦書字詩云書憑雁寄魚出王屋入匡廬文生益智道著清虛葛洪一萬卷惠子五車餘銀鈎屈曲索靖題橋司馬相如別後莫睽千里信數封緘送到閒居居易賦詩字詩云詩締美環奇明月夜落花時能助歡笑亦傷別離調清金石怨吟苦鬼神悲天下只應我愛世閒惟有君知自從都尉別蘇句便到司空送白辭

崔玄亮

玄亮爲散騎常侍後以太子賓客分司東都歸洛和樂天詩云病餘歸到

洛陽頭拭目開眉見白侯鳳詔恐君今歲去龍門欠我舊時遊自到未幾遊龍門

人樽下猶歌詠數盞燈前共獻酬相對憶劉劉在遠寒宵耿耿夢長洲夢得

詩云幾年侍從作朝臣卻向青雲索得身朝士忽爲方外士主人仍是眼中人

玄亮在洛與白樂天相從醉吟之樂曾有詩云共相呼喚醉歸來樂天答云居士忘筌默默坐先生枕麴昏昏睡早晚相從入醉鄉醉鄉此去無多

地

玄亮字晦叔磁州人太和中爲諫議大夫鄭注誣宋申錫捕逮倉卒內外

震駭玄亮率諫官叩延英苦諫帝感悟由是名重朝廷頃之移疾歸東都

召爲虢州刺史卒玄亮與元微之白樂天皆貞元初同年生也玄亮名最

後自詠云人閒不會雲閒事應笑蓬萊最後仙後白刺杭州元爲浙東廉

使刺越而崔刺湖州白以詩戲之曰越國封疆吞碧海杭城樓閣入青天

吳興卑小君應屈爲是蓬萊最後仙三郡有唱和詩謂之三州唱和集
樂天誌玄亮墓云公晚年師六祖以無相爲心地易簣之夕大怖將至如
入三昧恬然自安于遺疏之末手筆題云慙榮慙悴石敲火卽空卽色眼
生花許時爲客今歸去大曆元年是我家諸子中芻言罕言登進士第
元微之酬哥舒少府寄同年科第云前年科第偏年少未解知羞最愛狂
九陌爭馳好鞍馬八人同著綵衣裳注云同年科第宏詞呂二吳王十一
起拔萃白二十二居易平判李十一復禮呂四頻哥舒大垣崔二十八元
亮逮不肖八人皆奉榮養

元亮在湖州寄三癖詩與夢得言癖在詩與琴酒夢得和之竝序云柳吳
興亭皋隴首之句王融書之白團扇故夢得詩曰視事畫屏中自稱三癖
翁管絃汎春渚旌旆拂晴虹酒對青山月琴韻白蘋風會書團扇上知君
文字工

樂天夢得有除夜詩僧孺和云惜歲歲今盡少年應不知淒涼數流輩歡喜見孫兒暗減一身力潛添兩鬢絲莫愁花笑老花自幾多時

元和三年宣政殿試賢良方正能直言極諫科一十人登科其後僧孺李宗閔王起賈餗四人皆相次拜相先是白居易在翰林爲考校官後僧孺罷相出鎮揚州居易在洛中有詩送云北闕至東京風光十六程坐移丞相閣春入武陵城紅旆擁雙節白髮無一莖萬人開路看百吏立班迎閩外君彌重罇前我亦榮何須身自得將相是門生

公始至京致琴書灞滻閒先以所業謁韓文公皇甫員外二公披卷卷首有說樂一章未閱其詞遽曰且以拍板爲什麼對曰樂句二公相顧大喜曰期高文必矣公因謀所居二公良久曰可于客戶坊稅一廟院公如所教二公復誨之曰某日可遊青龍寺薄暮而歸二公其日聯鑣至彼因大書其門曰韓愈皇甫湜同謁幾官先輩不遇翌日輦轂名士咸往觀焉奇章之名由是赫然矣或云僧孺登第與同輩登政事堂宰相曰掃廳奉候

樂天在香山時僧孺在廣陵有詩曰唯羨東都白居易年年香積問禪師
樂天答云支許徒思遊白日夔龍未放下青天應須且爲蒼生住猶去懸

車十四年

時僧孺年五十七

樂天求箏於維揚僧孺先有詩曰但愁封寄去魔物或驚禪樂天云會教
魔女弄不動是禪心樂天云思黯自誇前後服鍾乳三千兩而歌舞之妓
甚多乃謔予衰老故答思黯詩云鍾乳三千兩金釵十二行妬他心似火
欺我鬢如霜慰老資歌笑銷愁仰酒漿眼看狂不得狂得且須狂奇章又
有詩云不是道公狂不得恨公逢我不教狂

公赴舉之秋嘗投贄于劉補闕禹錫對客展卷飛筆塗竄其文歷二十餘
歲劉轉汝州公鎮海南枉道駐旌信宿酒酣賦詩劉方悟往年改公文卷
僧孺詩曰粉署爲郎四十春今來名輩更無人休論世上升沈事且問樽
前見在身珠玉會應成咳唾山川猶覺露精神莫嫌恃酒輕言語曾把文
章謁後塵禹錫和曰昔年曾忝漢朝臣晚歲空餘老病身初見相如成賦

日後爲丞相掃門人追思往事咨嗟久幸喜清光笑語頻猶有當時舊冠劍待公三日拂埃塵牛公吟和詩前意稍解曰三日之事何敢當焉

宰相三朝

後主司印可
以升降百官

于是移宴竟夕方整前驅也劉乃戒其子咸久承雍曰吾成

人之志豈料爲非汝輩進修守中爲上

僧孺周秦行紀云余貞元中舉進士落第歸宛葉間至伊闕南道鳴皋山下將宿大安民舍會暮不至更十餘里其道甚異夜月始出忽聞有異香因而進行不知厭遠見火明意爲莊家更驅至一宅庭門若富家有黃衣人曰郎君何氏何至余曰僧孺牛姓應進士落第往大安民舍誤道來此黃衣入告少時出曰請郎君入拜殿下簾下語曰妾漢文帝母薄太后此是妾廟太后遣軸簾使上殿召坐食頃太后命召高祖戚夫人元帝王嬙余皆拜乃亦就坐太后迎唐太真楊妃齊潘妃余拜旣命饌太后問余曰今天子誰余對曰今皇帝名适代宗長子太后曰沈婆兒作天子也大奇命酒各賦詩余應教作詩曰香風引上大羅天月地花宮拜洞仙具道人

閒惆悵事不知今夕是何年太后曰秀才遠來今夕誰伴戚夫人先起辭
曰如意成長潘妃曰東昏侯誓不負他綠珠曰石衛尉嚴忌太后曰太真
今朝先帝貴妃重言其他太后目王昭君昭君不對低眉羞恨俄歸休余
爲左右送入昭君院旦侍人告起太后戚夫人昭君等皆泣別使朱衣送
余至大安民里余衣上香經十餘日不歇云

李紳

紳初以古風求知于呂溫溫見齊煦誦其憫農詩曰春種一粒粟秋收萬
顆子四海無閒田農夫猶餓死鋤禾日當午汗滴禾下土誰知盤中殮粒
粒皆辛苦又曰此人必爲卿相果如其言

奉酬樂天立秋日有懷見寄云深夜星漢靜秋風初報涼篁階淅瀝響露
葉參差光冰兔半升魄銅壺微滴長薄帷乍飄捲襟帶輕搖揚北除魂夢
靜斜月滿軒房屣履步前楹劍戟森在行重城宵正分號鼓互相望獨坐
有所思夫君鸞鳳章天津落星河一葦安可航龍泉白玉首魚服黃金裝

報國未知效維鵜徒在梁徘徊顧戎旃顛氣生東方衰葉滿欄草斑毛盈
鏡霜羸牛未脫轅老馬強騰驤吟君白雪唱慙愧巴人腸

紳江南暮春寄家云洛陽城見迎梅雪魚口橋逢送雪梅劍外寺前芳草
合鏡湖亭上野花開江鴻斷續翻雲去海燕差池拂水迴料得心知近寒
食潛聽喜鵲報歸來

開成閒紳集其詩爲追昔遊蓋歎逝感時發于悽恨而作也或長句或五
言或雜言或歌或吟或樂府齊梁不一其辭乃由牽思所屬爾赴梁漢歸
諫垣升翰苑感恩遇歌帝京風物遭讒邪播越歷荆楚涉湘沅逾嶺嶠抵
荒陬止高安移九江泛五湖過鍾陵泝荆江守滁陽轉壽春改賓客留洛
陽歷會稽過梅里遭讒邪再爲賓客分務歸東周擢川守鎮大梁詞有所
懷興生于怨故微顯不常其言亦異

南梁行云江城鬱鬱春草長悠悠漢水浮清光雜英飛盡空晝景綠楊重

陰官舍靜此時醉客縱橫書公言可薦承明廬

元和十四年故山南節度
僕射崔公奏觀察判官蒙

以書奏見委
常戲拙速

青天詔下寵光至頌籍金閨徵石渠

是歲五月蒙
恩除左拾遺

稀歸山路

煙嵐隔山木幽深晚花折澗底紅光奪火然搖風扇毒愁行客

駱谷中多
毒木名山

琵琶其花明豔與杜鵑花相
雜樵者識之言曰早花殺人

杜鵑啼咽花亦殷聲悲絕豔

一作

空山斜陽

瞥映淺深樹雲雨翻迷巖谷閒山鷄錦質矜毛羽透竹穿蘿命儔侶喬木
幽谿上下同雄雌不惑飛棲處望秦峯迴過商顏浪疊波堆萬簇山行盡
杳冥青嶂外九重鐘漏紫霄閒元和列侍明光殿諫草初焚市朝變北闕
趨承半隙塵南梁吟嘯皆飛霰追思感歎卻昏迷霜鬢愁吟到曉鷄故篋
歲深開斷簡秋堂月曙掩遺題嗚嗚曉角霞輝粲撫劍當楹一長歎芻狗
無由學聖賢空持感激終昏旦

憶春日太液池東亭候對云宮鸞曉報瑞煙開三島靈禽拂水迴橋轉綵
虹當綺殿檻浮花鷓近蓬萊草承步輦王孫長桃豔仙顏阿母栽簪筆此
時方侍從卻思金馬笑鄒枚

憶夜直金鑾奉詔承旨詩云月當雲漢玉繩低深聽簫韶碧落齊門壓紫

垣高綺樹閣連青瑣近丹梯墨宣外渥催飛詔草定新恩促換題明日
獨歸花路遠可憐人世隔雲泥

過荆門詩云荆江水闊煙波轉荆門路遠山蔥倩帆勢侵雲滅又明山城
背日昏還見青青麥隴啼飛鷗寂寞野徑棠梨花行行驅馬萬里遠漸入
煙嵐危棧賒林中有鳥飛幽谷月上千巖一聲哭腸斷思歸不可聞人言
恨魄來巴蜀我聽此鳥祝我魂魂死莫學聲銜冤縱爲羽族莫棲息直上
青雲呼帝閭此時山月如銜鏡巖樹參差互輝映皎潔深看入澗泉分明
細見樵人逕陰森鬼廟當郵亭雞豚日宰聞臙腥愚夫禍福日迷惑魍魎
憑何通百靈月低山曉問行客已酌椒漿拜荒陌惆悵忠貞徒自持誰祭
山頭望夫石

涉沅湘詩云屈原死處瀟湘陰滄浪淼淼雲沈沈蛟龍長怒虎長嘯山木
翛翛波浪深煙橫日落驚鴻起山映雲霞杳千里鴻叫離離入暮天霞消
漠漠深雲水水虛江暗揚波濤鼉鼉動盪風騷騷行人愁望待明月星漢

沈浮魑鬼號屈原爾爲懷王沒水府通天化靈物何不驅雷擊電除姦邪
空作沈泉抱冤骨舉杯瀝酒招爾魂月影晃漾開乾坤波白水黑山隱見
汨羅之上遙昏昏風帆候曉看五兩戍鼓寥寥遠山響潮滿江津猿鳥啼
荆夫楚語飛蠻槳瀟湘島浦無人居風驚水暗惟鮫魚行來擊棹獨長歎
問爾精魂何所如

悲善才詩余守郡日有客遊者善彈琵琶聞其所傳乃善才所授頃在內

庭日別承恩顧賜宴曲江勅善才等二十人備樂自余經播遷善才已沒

因追感前事爲悲善才穆王夜幸蓬池曲金鑾殿門高秉燭東頭弟子曹

善才琵琶請奏新翻曲翠蛾列坐層城女笙歌

一作笛

參差齊笑語天顏靜

聽朱絲彈衆樂寂然無敢舉銜花金鳳當承撥轉腕攏絃促揮霍扶花翻

鳳天上來徘徊滿殿飛春雪抽絃度曲新聲發金鈴玉佩相磋切流鶯子

母飛上林仙鶴雌雄唳明月此時奉詔侍金鑾別殿承恩許召看三月曲

江春草綠九霄天樂下雲端紫髯供奉前屈郟盡彈妙曲當春日寒泉注

射隴水開胡雁翻飛朔天沒日曛塵暗車馬散爲惜新聲有餘歎明年冠
劍閉橋山萬里孤城投海畔籠禽鍛翮尙還飛白首生從五嶺歸聞道善
才成朽骨空餘弟子奉宣徽南譙寂寞三春晚有客彈絃獨悽怨靜聽深
奏楚明光憶昔初聞曲江宴心悲不覺淚闌干更爲調絃反覆彈秋吹動
搖神女佩月珠敲擊水精盤自憐淮海同泥滓恨魄凝心未能死惆悵追
懷萬事空雍門感慨徒爲爾

憶過潤州詩元和二年余以進士爲鎮海軍書奏從事秋七月兵亂余以
不從書奏飛檄之詐遭庶人李錡暴怒腰領不殊者再三後軍平尙書李
公欲具事以聞余以本乃誓節非欲求榮罷所奏詩云昔年從宦干戈地
黃綬青春一魯儒弓犯控絃招武族劍當抽匣問狂夫帛書投筆封魚腹

玄髮衝冠捋虎鬚談笑謝金何所貴不爲偷買用兵符
元微之和樂天東南行云李多嘲螻蛄竇數集蜘蛛注云李二十多詠物
之作竇七頗改官銜屢有蜘蛛之喜樂天詩曰悶勸迂辛酒閒吟短李詩

迂辛辛邱度也邱度之子一日自云辛氏子來見紳曰小子每憶白二十
二丈詩悶勸疇昔酒閒吟二十丈詩紳笑曰辛大有此狂兒吾敢不存舊
樂天贈紳詩云一篇長恨有風情十首秦吟近正聲剛被老元偷格律苦
教短李負歌行注云元九往江陵余以詩一軸贈行自是格變李二十嘗
自負歌行近見余樂府五十首默然心伏樂天藏書東都聖善寺號白氏
文集紳有詩以美之云寄玉蓮花藏緘珠貝葉扁院閒容客讀講倦許僧
聽部列雕金榜題存刻石銘永添鴻寶集莫雜小乘經
紳字公垂中書令敬玄曾孫號短李穆宗召爲翰林學士與李德裕元稹
同時號三俊武宗時爲相居位四年出鎮淮南卒

沈傳師

子詢

傳師次潭州酬唐侍御姚員外遊道林嶽麓寺題示云承明年老輒自論
乞得湘守東南奔爲聞楚國當山水青嶂邇池僧家園含香珥筆皆眷舊
謙撝自忘臺省尊不令致簡候亭館直許攜手遊山樊忽驚列岫曉來逼

朔雪洗盡煙嵐昏碧波迴嶼三山轉丹檻繚郭千艘屯華鑣蹀躞絢砂步
大旆綵錯輝松門樛枝競驚龍蛇勢折幹不滅風霆痕相重古殿倚巖腹
別引新徑縈雲根目傷平楚虞帝魂情多思遠聊開罇危絃細管逐歌飄
一畫鼓繡靴隨節翻鏘金七言凌老杜入木八法蟠高軒嗟余潦倒久
不知一作利忍復感激論元元

傳師字子言既濟之子材行有餘權德輿門生七十人推爲顏子終吏侍
子詢字誠之亦能文咸通中爲昭義節度使詢清粹端美神仙中人也制
除山北節旄京師咸誦曹唐遊仙詩贈之云玉詔新除沈侍郎便分茅土
領東方不知今夜遊何處侍從皆騎白鳳凰

李德裕觀察浙西有招隱山觀玉藥花詩云玉藥天中樹金闈昔共窺落
英閒舞雪密葉下低帷內署沈大丈所居閣前有此花落空中回旋舊賞
煙霄遠前歡歲月移今來想顏色還似憶瓊枝

傳師和云曾對金鑾直同依玉樹陰雪英飛舞近煙葉動搖深素萼年年

密衰容日日侵勞君想華髮近欲不勝簪

盧羣

唐淮西節度使吳少誠不奉詔令羣使蔡州詰之羣諭以君臣之分忠順之義少誠乃從命羣又與唱和賦詩自言以反側當蒙隔在恩外羣于筵中醉而歌曰祥瑞不在鳳凰麒麟太平須得邊將忠臣衛霍眞誠奉主貌貅十萬一身江河潛注息浪蠻貊款塞無塵但得百寮師長肝膽不用三軍羅綺金銀少誠大悅羣以奉使稱旨遷秘書監羣字載初范陽人終于義成軍節度使

劉禹錫

三鄉驛樓伏覩明皇望女几山詩斐然有感云開元天子萬事足惟惜當時光景促三鄉陌上望仙山歸作霓裳羽衣曲仙心從此在瑤池三清八景相追隨天上忽乘白雲去世間惟有秋風辭

長慶中元微之夢得韋楚客同會樂天舍論南朝興廢各賦金陵懷古詩

劉滿引一杯飲已卽成曰王濬樓船下益州金陵王氣黯然收千尋鐵鎖
沈江底一片降幡出石頭人世幾回傷往事山形依舊枕寒流而今四海
爲家日故壘蕭蕭蘆荻秋白公覽詩曰四人探驪龍子先獲珠所餘鱗爪
何用耶于是罷唱

詩弔張曲江曰聖言貴忠恕至道重觀身法在何所恨色傷斯爲仁良時
難久恃陰謫豈無因寂寞韶陽廟魂歸不見人

元和十年自朗州召至京戲贈看花君子云紫陌紅塵拂面來無人不道
看花回玄都觀裏桃千樹盡是劉郎去後栽

再遊玄都觀絕句竝序云余貞元二十一年爲屯田員外郎時此觀未有
花是歲出牧連州貶朗州司馬居十年召至京師人人皆言有道士手植
仙桃滿觀如紅霞遂有前篇以誌一時之事旋又出牧今十有四年復爲
主客郎中重遊玄都蕩然無復一樹惟兔葵燕麥動搖于春風耳因再題
二十八字以俟後遊時太和二年三月也詩云百畝庭中半是苔桃花落

盡菜花開種桃道士歸何處前度劉郎今又來

禹錫嘗對賓友每吟張博士籍詩云藥酒欲開期好客朝衣暫脫見閒身
對花木則吟王右丞詩云興闌啼鳥緩坐久落花多白二十二好余秋水
詠云東屯滄海闊南漾洞庭寬余自知不及韋蘇州春潮帶雨晚來急野
渡無人舟自橫嘗過洞庭雖爲一篇思杜員外落句云年去年來洞庭上
白蘋愁殺白頭人鄙夫之言有愧于杜公也楊茂卿校書過華山詩曰河
勢崑崙遠山形菡萏秋此實爲佳句

贈歌人米嘉榮詩云唱得梁州意外聲舊人惟有米嘉榮近來年少輕前
輩好染髭鬚事後生

禹錫赴吳臺揚州大司馬杜公鴻漸開宴命妓侍酒禹錫詩曰高髻雲鬢
宮樣妝春風一曲杜韋娘司空見慣渾閒事斷盡蘇州刺史腸

白樂天任杭州刺史攜數妓還洛陽後卻還錢塘故禹錫戲答云其那錢
塘蘇小小憶君淚點石榴裙沈存中曰禹錫霓裳羽衣曲云三鄉陌上望

仙山歸作霓裳羽衣曲又王建詩云聽風聽水作霓裳樂天詩注云開元中西涼府節度使楊敬述造鄭嵎津陽門詩注云葉法善嘗引上入月宮聞仙樂及上歸但記其半遂于笛中寫之會西涼府都督楊敬述進婆羅門曲與其聲調相符遂以月中所聞爲散序用敬述所進爲其腔而名霓裳羽衣曲說各不同今蒲州逍遙樓楣上有唐人橫書類梵字相傳是霓裳譜字訓不通莫知是非或謂今燕部有獻仙音曲乃其遺聲然霓裳本謂之道調法曲今獻仙音乃小石調耳未知孰是

山圍故國周遭在潮打空城寂寞迴淮水東邊舊時月夜深還過女牆來樂天掉頭苦吟歎賞良久曰石頭詩云潮打空城寂寞迴吾知後之詩人不復措辭矣

禹錫與樂天唱和號劉白唱和集與裴度唱和號汝洛集與令狐楚唱和號彭陽唱和集與李德裕唱和號吳蜀集

禹錫字夢得埶叔文擢度支員外郎人不敢斥其名號二王劉柳憲宗立

禹錫貶連州未至斥朗州司馬作竹枝詞武元衡初不爲宗元所喜自中丞下除右庶子及是執政禹錫久落魄乃作問太鈞謫九年等賦又敍張九齡事爲詩欲感諷權要久之召還宰相欲任南省郎乃作玄都觀看花君子詩當路不喜出爲播州易連州徙夔州由和州刺史入爲主客郎中復作遊玄都觀詩有兔葵薺麥之語聞者益薄其行俄分司東都裴度薦爲集賢學士度罷出刺蘇州徙汝同二州會昌時檢校禮部尙書卒

禹錫晚年與白傅友善詩筆文章時無在其右者常與禹錫唱和往來因集其詩而序之曰彭城劉夢得詩豪者也其鋒森然少敢當者予不量力往往犯之夫合應者聲同交爭者力敵一往一復欲罷不能由是每制一篇先于視草則興作興作則文成一二年來日尋筆研同贈和答不覺滋多太和三年春已前紙墨所存者凡一百三十八首其餘乘興伏醉率然口號者不在此數因而命小姪龜兒編勒成兩軸仍寫二本一付龜兒一付夢得小兒崑郎各令收藏坳兩家文集予頃與元微之唱和頗多或在

人口嘗戲微之云僕與足下二十年來爲文友詩敵幸也亦不幸也吟咏性情播揚名聲其適遺形其樂忘老幸也然江南士女語才子者多云元白以子之故僕不得獨步于吳越閒此亦不幸也今垂老復遇夢得非重不幸耶夢得曰文之神妙莫先于詩若妙與神則吾豈敢如夢得雪裏高山頭白早海中仙果子生遲沈舟側畔千帆過病樹前頭萬木春之句類真謂神妙矣在在處處應有靈物護持豈兩家子弟秘藏而已其爲名流許與如此

故國恩如此若爲天外心

寄白公

湖上收宿雨

句

故人日已遠窗下塵滿琴

坐對一罇酒恨多無力斟幕疎螢色迴露重月華深萬境與羣籟此時情

豈任

無題

禪思何妨在玉琴眞僧不見聽時心秋堂境寂夜方半雲去蒼梧

湘水深

聽琴

右張爲取作主客圖

夢得曰柳八駿韓十八平淮西碑云左餐右粥何如我平淮西雅云仰父俯子韓碑兼有帽子使我爲之便說用兵伐叛矣夢得曰韓碑柳雅余詩

有云城中晨雞喔喔鳴城中鼓角聲和平美愬之入蔡城也須臾之間賊無覺者又落句云始于元和十二載重見天寶昇平時以見平淮之年云禹錫敍董挺文集云詩其文章之蘊耶義得而言喪故微而難能境生于象外精而寡合千里之謬不容秋毫非有的然之姿可使戶曉必俟知者然後鼓行于時自建康距永明以還詞人比肩唱和相發有以朔風零雨高視天下蟬噪鳥鳴蔚在史策國朝因之粲然復興由篇章以躋貴仕者相踵而起

封孟紳

行不由徑詩云欲速竟何成康莊亦砥平天衢皆利往吾道泰方行不復由荒徑無因見蔣生三條遵廣達九軌上安貞紫陌悠悠去芳塵步步清澹臺千載後公道有遺名

孟紳貞元十五年高郢下進士第一人終于太常卿

陳潤

賦得浦外虹云日影化爲虹彎彎出浦東一條微雨後五色片雲中輪勢
隨天度橋形跨海通還將飲水處持送使車雄

寒食下作云江南寒食早二月杜鵑鳴日暖山初綠春寒雨欲晴浴蠶當
社日改火待清明更喜瓜田好令人憶邵平

賦得秋河曙耿耿云晚望秋高夜微明欲曙河橋成鵲已去機罷女應過
月上殊開練雲行類動波尋源不可到耿耿復如何

送駱徵君云野人應辟命溪上掩柴扉黃卷猶將去看山豈更歸馬留苔
蘚迹人脫薜蘿衣他日相思處天邊望少微

潤大曆閒人終坊州鄜城縣令樂天之外祖也丈夫不感恩感恩寧有淚
心頭感恩血一滴染天地右張爲取作主客圖

...

...

...

...

...

...

...

...

...

...

...

...

...

唐詩紀事卷第三十九

唐詩紀事卷第四十

范傳正

薛存誠

賈島

馬異

張登

包佶

長孫佐輔

李正封

崔護

張又新

陸復禮

柳公權

陸鴻漸

王季則

王公亮

徐牧

陳存

范傳正

謝真人過舊山云麾蓋從仙府笙歌入舊山水流丹竈缺雲起草堂關白
鹿行爲衛青鸞舞自閒種松鱗未立移石蘚仍斑望路煙霞外迴輿巖岫
閒豈惟遼海鶴空歎令威還

鮑溶人日陪宣州范中丞傳正與范侍御宴云人日春風綻早梅謝家兄
弟看花來吳姬對酒歌千曲秦女留人酒百杯絲柳向空初宛轉玉山看
日漸徘徊流光易去歡難得莫厭頻頻上此臺

上巳泛舟詩云令節推元巳天涯喜有期初筵臨泛地舊俗祓禳時枉渚

唐詩

紀

事

卷第四十

一

無錫丁氏校刊

潮新上殘春日正遲竹枝遊女曲桃葉度江詞風鷄今方退沙鷗亦未疑
且同山簡醉倒戴莫褰帷

傳正元和十二年廉訪宣池遷李白墳于青山之陽爲銘曰嵩嶽降神是
生輔臣蓬萊謫眞斯爲逸人晉有七賢唐稱八仙應彼星象唯公一焉晦
以麴蘖暢于文編萬象奔乎筆端萬慮混乎樽前臥必酒甕行必酒船吟
風詠月席地幕天但貴適其所適不知胡然而然艱虞一身委蛻百年謝
家山兮李公墓異代詩流同此路舊墳畀痺風雨侵新宅爽塏松柏林故
鄉萬里且無嗣二女從民永於此猗與琢石爲二碑一藏幽壑一臨歧岸
深谷高變化時一存一毀名不虧

傳正爲宣歙觀察頗事華侈憲宗知之代還拜光祿卿性精悍初自整飭
官益達用度益奢傾貲貨市權貴私公府如家帑亦幸素有名不敗云

薛存誠

暮春自南臺丞再除給事中仍是本廳几榻杖履宛然如舊云再入青瑣

聞忝官誠自非拂塵驚物在開戶似僧歸積草漸無逕殘花猶灑衣禁垣
偏日近行坐是恩輝

盧綸同存誠登栖巖寺云衰蹇步難前上山如上天塵泥來自晚猿鳥到
何先萬壑應孤磬百花通一泉蒼蒼此明月下界正沈眠

存誠字資明河中人登貞元進士第和易容物而當官毅然不可奪元和
末爲御史中丞卒

賈島

字浪仙范陽人初爲浮屠名無本能詩獨變格入僻以矯豔于元白來洛
陽韓愈教爲文去浮屠舉進士終普州司戶島久不第吟病蟬之句以刺
公卿或奏島與平曾等爲十惡逐之詩曰病蟬飛不得向我掌中行折翼
猶能薄酸吟尙極清露華凝在腹塵點悞侵睛黃雀并烏鳥俱懷害爾情
大中末授遂州長江簿初之任屆東川守者厚禮之島獻感恩詩曰匏革
奏終非獨樂軍城未曉啟重門何時卻入三台貴此日空知八座尊羅綺

舞中收雨點，貌貅闔外卷。雲根逐遷屬，吏隨賓列撥。棹扁舟，不忘恩自長。
江遷普州司倉方干自鏡湖寄詩曰：亂山重復疊，何路訪先生。豈料多才
者，空垂不第名。閒曹猶得醉，薄俸亦勝耕。莫問吟詩苦，年年芳草平。島至
老無子，因啖牛肉得疾，終于傳舍。

送長安惟鑒法師云：講經春色裏，花繞御牀飛。南海幾回渡，舊山臨老歸。
觸風香損印，霑雨磬生衣。雲水路迢遞，往來消息稀。

題杜司戶亭子云：牀頭枕是溪中石，井底泉通竹下池。宿客未眠過夜半，
獨聞山雨到來時。

題李款一作凝幽居云：閒居少鄰並，草徑入荒村。鳥宿池邊樹，僧敲月下門。
過橋分野色，移石動雲根。暫去還來此，幽期不負言。

哭柏崑和尚云：苔覆石牀新，吾師去幾春。寫留行道影，焚卻坐禪身。塔院
關松雪，房門一作房鎖隙塵。自嫌雙淚下，不是解空人。永叔云：焚卻坐禪身，乃是燒殺活和尚也。

哭孟郊云：身死聲名在多，應萬古傳。寡妻無子息，破宅帶林泉。冢近登山

道詩隨過海船故人相弔後斜日下寒天

普州有岳陽山鳥葬于此唐安程錡從事倅岳陽有詩曰倚恃才難繼昂
藏貌不恭騎驢衝大尹奪卷忤宣宗馳譽超前輩居官下我儂司倉舊曹
署一見一心忡

唐末舉子李克恭有詩曰一一玄微縹緲成盡吟方更爽神情宣宗謫去
爲閒事韓愈知來已振名海底也應搜得淨月輪常被翫教傾如何未隔
四十載不遇論量向此生

夜半長安雨燈前越客吟

贈吳處士句

島嶼夏雲起汀洲芳草深句秋風吹渭

水落葉滿長安句山鐘夜度空江水汀月寒生古石樓句舊國別多日故

人無少年句右張爲取作主客圖

李洞過浪仙舊地云鶴外唐來有謫星長江東注冷滄溟境搜松雪仙人
島吟歇林泉主簿廳片月已能臨榜黑遙天何益抱墳青年年誰不登高
第未勝騎驢入畫屏

姚合寄島云寂寞荒原下南山只隔籬家貧惟我竝詩好復誰知草色無窮處蟲聲少盡時朝昏鼓不到閒臥益相思

浪仙寄友人云一日不作詩心源如廢井筆硯爲轆轤吟詠作縻綆朝來重汲引依舊得清泠書贈同懷人詞中作苦辛

島赴舉至京騎驢賦詩得僧推月下門之句欲改推爲敲引手作推敲之勢未決不覺衝大尹韓愈乃具言愈曰敲字佳矣遂竝轡論詩久之或曰吟落葉滿長安之句唐突大尹劉栖楚被繫一夕放之

朝飢云市中有樵山此舍無朝煙井底有甘泉釜中乃空然我要見白日雪來塞青山坐聞西牀琴凍折兩三絃飢莫詣他門古人有拙言

再投李益常侍云何處初投刺當時赴尹京淹留花柳變然諾肺腸傾避暑蟬移樹高眠雁過城人家嵩岳色分府洛河聲聯句逢花盡嘗茶見月生新衣裁白紵思從曲江行

王建寄島詩云盡日吟詩坐忍飢萬人中覓似君稀僮眠冷榻朝猶臥驢

放秋田夜不歸傍暖旋收紅葉落覺寒重著舊生衣曲江池畔時時到爲
愛鷓鴣雨裏飛

島詩有警句韓退之喜之其渡桑乾詩曰客舍并州已十霜歸心日夜憶
咸陽如今更渡桑乾水卻望并州是故鄉

又赴長江道中詩曰策杖馳山驛逢人問梓州長江那日到行客替生愁
晉公度初立第于街西興化里鑿池種竹起臺榭島方下第或以爲執政
惡之故不在選怨憤題詩曰破卻千家作一池不栽桃李種薔薇薔薇花
落秋風起荆棘滿庭君始知皆惡其不遜島爲僧時洛陽令不許僧午後
出寺賈有詩云不如牛與羊猶得日暮歸韓愈惜其才俾反俗應舉貽其
詩云孟郊死葬北邙山日月星辰頓覺閒天恐文章中斷絕再生賈島在
人閒由是振名或曰非退之詩

延康吟詩云寄居延壽里爲與延康隣不愛延康里愛此望中人人非十
年故人非九族親人有不朽語得之煙山春

望山詩云南山三十里不見踰一旬冒雨時立望望之如朋親虬龍一掬
波洗蕩千萬春日雨不斷愁殺望山人天事不可長勁風來如奔陰霪
一已掃浩翠寫國門長安百萬家家張屏新誰家最好山我欲爲其鄰

馬異

送皇甫湜赴舉云馬蹄聲特特去入天子國借問去是誰秀才皇甫湜吞
吐一腹文八音兼五色主文有崔李郁郁爲朝德青銅鏡必明朱絲繩必
直稱意太平年願子長相憶

貞元旱歲云赤地炎都寸草無百川水沸煮蟲魚定應焦爛無人救淚落
三篇古尙書

暮春醉中寄李千云歡異且交親酒生開蠶春不須愁犯卯且乞醉過申
折草爲籌筓鋪花作錦裯嬌鶯解言語留客也慙慙

異河南人與盧仝結交答仝結交詩云有鳥自南翔口銜一書札達我山
之維開緘金玉煥陸離乃是盧仝結交詩此詩峭絕天邊格力與文星色

相射長河拔作數條絲太華磨成一拳石莫嗟獨笑無往還月中芳桂難
遊攀況值亂邦不平年迴陵倒谷如等閒與君俛首大艱阻喙長三尺不
得語因君今日形章句羨獼猴兮著衣裳悲蚯蚓兮安翅羽上天不識察
仰我爲遼天失所將吾劍兮切淤泥使良驥兮捕老鼠昨日脫身卑賤籠
卯星借與老人峯抱鋤劓地芸芝朮偃蓋參天舊有松我與松兮保身世
臥居居兮起于于漱潺潺兮聆嘒嘒道在其中可終歲不教辜負堯爲帝
燒我荷衣摧我身回看天地如砥平銅刀剗骨不辭去早窮君子今明明
俛首辭山心慘惻白雲雖收戀不得看雲且擬直須臾疾風又卷西飛翼
爲報覃懷新結交死生富貴存後凋我心不畏朱公叔君意須防劉孝標
以膠投漆苦不早就中相去萬里道河水悠悠山之間無由把袂攄懷抱
憶全吟文能治臭成蘭薰不知何處清風夕擬使張華見陸雲

張登

招客遊寺云江城吏散捲春陰山寺鳴鐘隔雨深招取遺民赴僧社竹堂

分坐靜看心

小雪日戲題絕句云甲子徒推小雪天刺梧猶綠槿花然融和長養無時歇卻是炎洲雨露偏

送王主簿遊南海云平生推久要留滯共三年明日東南路窮荒霧露天曠懷常寄酒素業不言錢道在貧非病時來醜亦妍過山乘蠟屐涉海附樓船行矣無爲恨宗門有大賢

包佶

字幼正潤州人登進士第爲諫議大夫坐善元載貶嶺南劉晏奏起爲汴東兩稅使

酬于侍郎湖南見寄云桂嶺千巖斷湘流一派通長沙今賈傅東海舊于公章甫經殊俗離騷繼雅風金閨文作字玉匣氣成虹翰墨時無侶丹青夙在公主恩留左掖人望積南宮巧拙循名異浮沈顧位同九遷歸上略二已契愚衷責謝庭中吏悲寬塞上翁楚材欣有適燕石愧無工山曉重

嵐外林春苦霧中雪花翻海鶴波影倒江楓去札頻逢信回帆早掛空避
賢方有日非敢愛微躬

贈廬山白鶴觀劉尊師云蒼蒼五老霧中壇杳杳三山洞裏官手護崑崙
象牙簡心推霹靂棗枝盤春飛雪粉加毫潤曉漱瓊膏冰去聲齒寒漸恨流
年筋力少惟思露冕事星冠

嶺下臥病寄劉長卿云惟有貧兼病能令親愛疎歲時供放逐身世付空
虛脛弱秋添絮頭風曉廢梳波瀾喧衆口藜藿靜吾廬喪馬思開卦占鴉
懶發書十年江海隔離恨子知予敘其遷謫之狀也
佶父融與賀知章張若虛張旭號吳中四士

長孫佐輔

擬古詠河邊枯樹云野火燒枝水洗根數圍孤樹半心存應是無機承雨
露卻將春色寄苔痕

別友人云愁多不忍醒時別想極還尋靜處行誰遣同衾又分首不知行

踏本無情

南中客舍對雨送故人歸北云猿聲啾啾雁聲苦卷簾相對愁不語幾年
客吳君在楚況送君歸我猶阻家書作得不忍封北風吹斷階前雨

杭州秋日別故友云相見又相別大江秋水深悲歡一世事去住兩鄉心
浙瀝籬下葉淒清階上琴獨隨孤棹去何處更同衾

代別後夢別云別中還夢別悲後更生悲覺夢俱千里追隨難再期翻思
夢裏苦卻恨覺來遲縱是非真事何妨夢會時

答邊信云征人去年戍邊水夜得邊書字盈紙揮刀就燭裁紅綺結作同
心答千里君寄邊書書莫絕妾答同心心自結同心再解心不離書字頻
看字愁滅結成一夜和淚封貯書只在懷袖中莫如書字故難久願學同
心長可同

對鏡吟云憶昔逢君新納娉青銅鑄出千年鏡意憐光彩固無瑕義比恩
情永相映每將鑒面兼鑒心鑒來不輟情逾深君非結心空結帶結處尙

新恩已背開簾鑒鏡悲難語對面相看孟門阻掩匣徒慙雙鳳飛懸臺欲
效孤鸞舞昔日照來人共許今朝照罷自生疑鏡上有塵猶可拂君恩詎
肯無迴時

山行書事云日落風颺颺驅車行遠郊中心有所悲苦去穿黃茅茅中狐
兔窠四面烏鳶巢鬼火時獨出人煙不相交行行近破村一徑欲還坳迎
霜聽蟋蟀向月看蠨蛸翁喜客來至客來羞廚庖濁醪誇潑螳時果仍新
苞相歡對寒爐呼兒爇枯梢性朴頗近古其言無斗筭憂歡世上并歲月
途中拋誰知問津客空作楊雄嘲

古宮怨云窗前好樹名玫瑰去年花落今年開無情春色尙識返君心忽
斷何時來憶昔妝成候仙仗宮鎖玲瓏日新上拊心卻笑西子颯掩鼻誰
憂鄭姬謗草染文章衣下履花黏甲乙牀前帳三千玉貌休自誇十二金
釵獨相向盛衰傾奪欲何如嬌愛翻悲逐佞諛重遠豈能慙沼鵠棄前方
見泣船魚看籠不記薰龍腦詠扇空曾禿鼠鬚始喜類蘿新託柏終傷如

薺卻甘荼院深獨開還獨閉鸚鵡驚飛苔覆地滿箱舊賜前日衣滴枕新
垂夜來淚恨多開鏡照還悲綠髻青蛾尙未衰莫道新縑長絕比猶逢故
劍會相追

佐輔德宗時人弟公輔爲吉州刺史往依焉佐輔有傷故人歌妓云愁臉
無紅衣滿塵萬家門戶不容身曾將一笑君前去悞殺幾多回顧人右張
爲取此詩作主客圖

李正封

洛陽清明日雨霽云曉日清明天夜來嵩少雨千門尙煙火九陌無塵土
酒綠河橋春漏閒宮殿午遊人戀芳草半犯嚴城鼓

詠露云霏霏靈液重雲表無聲落霑樹急立蟬灑池淒皓鶴流塵清遠陌
飛月澄高閣宵潤玉堂簾曙寒金井索佳人比珠淚坐感紅綃薄

唐文皇好詩太和中賞壯丹上謂程修己曰今京邑人傳牡丹詩誰爲首
出對曰中書舍人李正封詩天香夜染衣國色朝酣酒時楊妃侍上曰妝

臺前宜飲以一紫金盞酒則正封之詩見矣

夏遊招隱寺暴雨晚晴云竹陌風雨過蕭疎臺殿涼石渠瀉奔溜金刹照
頽陽鶴飛巖煙碧鹿鳴澗草香山僧引清梵幡蓋繞迴廊

禪門寺暮鐘云簏簾高懸于闐鐘黃昏發地殷龍宮遊人憶到嵩山夜疊
閣連樓倚太空

退之正封從軍有晚秋鄆城聯句詩正封云從軍古云樂談笑青油幕燈
明夜觀棊月暗秋城柝遂爲警策

正封字中護終監察御史

崔護

曉雞云黯黯嚴城罷鼓鞳數聲相續出寒棲不嫌驚破紗窗夢卻恐爲奴
半夜啼

山雞舞石鏡云廬峯開石鏡人說舞山雞物象纖無隱禽情祇自迷景當
煙霧歇心喜錦翎齊宛轉烏呈彩婆娑鳳欲栖何言資羽族在地得天倪

應笑翰音者終朝飲敗醢

沈存中云唐人以詩主人物故雖小詩莫不熒揉極工而後已所謂句鍛月鍊者信非虛言小說護題城南詩其始曰去年今日此門中人面桃花相映紅人面不知何處去桃花依舊笑春風後以其意未全語未工改第三句曰人面祇今何處去至今所傳有此兩本惟本事詩作祇今何處在唐人作詩大率如此雖有兩今字不恤也取語意爲主耳後人以其有兩

今字故多行前篇

筆談

護舉進士不第清明獨遊都城南村居得花木叢萃叩門久有女子自門隙問之對曰尋春獨行酒渴求飲女啓關以盂水至獨倚小桃柯佇立而意屬殊厚崔辭起送至門如不勝情而入後絕不復至及來歲清明徑往尋之門庭如故而戶扃鎖矣因題去年今日此門中之詩于其左扉
護字殷功貞元十二年登第終嶺南節度使

張又新

郡齋三月下旬作云春事日已歇池塘曠幽尋殘紅披獨墜初綠閒淺深
偃仰倦芳褥顧步愛新陰謀春未及竟夏初遽見侵

三月五日陪裴大夫泛長沙東湖詩云上已餘風景芳辰集遠坳綵舟浮
泛蕩繡轂下娉婷草樹迴葱蒨笙歌轉杳冥湖光迷翡翠草色醉蜻蜓鳥
弄桐花日魚翻穀雨萍從今留勝會誰看畫蘭亭

五月水邊柳詩云結根挺涯涘垂影覆清淺睡臉寒未開嫩腰晴更軟搖
空條已重拂水帶方展似醉煙景凝如愁月露泫絲長魚悞恐枝弱禽驚
踐悵別幾多情含春任攀攀

時號又新張三頭謂進士狀頭宏詞勅頭京兆解頭又新嘗作廣陵從事
有酒妓每致情焉後二十年罷江南郡舟道廣陵適李紳鎮淮南又新方
懼其讐已而又遇風漂沒二子紳憫然復書曰端溪不讓之辭愚罔懷怨
荆浦沈淪之事鄙實憫然宴遇殊厚前所謂酒妓者猶在席又新以指染
酒題盤上爲詞曰雲雨分飛二十年當時求夢不曾眠今來頭白重相見

還上襄陽玳瑁筵李卽令妓歌以送酒

又新與楊虔州善楊妻李有德無容又新求婚于楊曰得美室足矣楊曰但與我同好定諧君心又新旣成婚殊失望乃爲詩曰牡丹一朵值千金將謂從來色最深今日滿欄開似雪一生辜負看花心

看一作惜

又新字孔昭薦之子附逢吉罷貶汀州刺史又附李訓訓死復坐貶終左司郎中

陸復禮

貞元八年宏詞試中和節詔賜公卿尺詩云春仲令初吉歡娛樂大中皇恩貞百度寶尺賜羣公欲使方隅法還令規矩同捧觀珍質麗拜受皇恩崇如荷邱山重思酬分寸功從茲度天地與國慶無窮是歲復禮第一人李觀裴度次之

柳公權

公權武宗朝在內庭上嘗怒一宮嬪久之旣而復召謂公權曰朕怪此人

若得學士一篇當釋然矣目御前蜀牋數十幅授之公權略不佇思而成一絕曰不分前時忤主恩已甘寂寞守長門今朝卻得君王顧重入椒房拭淚痕上大悅令宮人上前拜謝之

文宗時充翰林學士後幸未央宮苑中駐蹕謂公權曰我有一喜事邊上衣賜久不及時今年二月給春衣訖公權前奉賀上曰可賀我以詩宮人迫其口進公權應聲曰去歲雖無戰今年未得歸皇恩何以報今日得春衣上悅激賞之

文宗夏日與諸學士聯句曰人皆苦炎熱我愛夏日長公權續曰薰風自南來殿閣生微涼五學士屬和帝獨諷公權兩句辭清意足不可多得乃令公權題于壁上字方圓五寸帝視之嘆曰鍾王復生無以加矣公權字誠懸卒于太子少保

陸鴻漸

太子文學陸鴻漸名羽其先不知何許人景陵龍蓋寺僧姓陸于堤上得

初生兒收養之遂以陸爲氏及長聰俊多聞學贍辭逸恢諧辨捷性嗜茶始創煎茶法至今鬻茶之家陶爲其像置于煬器之間云宜茶足利至太和復州有一老僧云是陸僧弟子常諷其歌云不羨黃金疊不羨白玉杯不羨朝入省不羨暮入臺惟羨西江水長向金陵城下來鴻漸又撰茶經三卷行于代今爲鴻漸形因目爲茶神有售則祭之無則以釜湯沃之皇甫曾送鴻漸採茶相過詩云千峯待逋客香茗復叢生採摘知深處煙霞羨獨行幽期山寺遠野飯石泉清寂寂然燈夜相思一磬聲吳門有辟疆園地多怪石鴻漸翫月詩云辟疆舊林閒怪石紛相向

權載之送陸太祝赴湖南幕詩云不憚征路遙定緣賓禮重新知折柳贈舊侶乘籃送此去佳句多楓江接雲夢

按鴻漸自太子文學徒太常寺太祝不就職

王季則

魚上冰云北陸收寒盡東風解凍初冰消通淺溜氣變躍潛魚應節似知化揚鬻任所如浮沈非樂藻泝泝異傳書綴網時空久臨川意有餘爲龍

將可望今日愧才虛
季則登元和進士第

王公亮

魚上冰詩云春生寒氣減稍動久潛魚乍喜東風至來看曲岸初出冰朱
鬣見望日錦鱗舒漸覺流澌近還欣掉尾餘唼喁情自樂泓泝意寧疎儻
得隨鯤化終能上太虛

公亮登貞元進士第長慶初上兵書十八卷自司門郎中爲商州刺史制
云茂于學精于文文學之外有析毫剗鍾之用自佐戎律領郡符持憲爲
郎皆稱厥職今以爲商州以爾精敏當自得中

徐牧

臨淵羨魚詩云清泚濯纓處今來喜一臨慙無下釣處空有羨魚心退省
時頻改謀身歲屢沈鬣成川上媚網就水寧深頰尾臨波裏朱鬣破浪潯
此時儻不漏江上免行吟

陳存

穆陵路詩云西遊匣長劍日暮湘楚閒歇馬上秋草逢人問故關孤村綠塘水曠野白雲山方念此中去何時此路還

寓居武丁館云暑雨飄已過涼颿觸幽衿虛館無喧塵綠槐多晝陰俯視古苔積仰聆早蟬吟放卷一長想閉門千里心

送劉秀才南歸詩云鳥啼楊柳垂此別千萬里古路入商山春風生灞水停車落日在罷酒離人起蓬戶寄龍沙送歸情詎已
存大曆貞元閒詩人

唐詩紀事卷第四十

唐詩紀事卷第四十一

白行簡

章孝標

施肩吾

鮑溶

孟簡

李程

張蕭遠

許康佐

許堯佐

張南史

朱晝

侯喜

蔣防

白行簡

春從何處來詩云欲識春生處先從木德來入門潛報柳度嶺暗驚梅透
雪寒花散消冰水鏡開曉迎郊綺發夜逐斗光回淑氣寅中變新聲雨後
催偏宜資律呂應是候陽臺

在巴南望郡南山云臨江一嶂白雲閒紅綠層層錦繡斑不作巴南天外
意何殊昭應望驪山樂天和云返照前山遠樹明從君苦道似華清試聽

腸斷巴猿叫早晚驪山有此聲

時樂天在忠州

九日作云降虜意如何窮荒九日初三秋異鄉客一紙故人書對酒情無
限開緘思有餘感時空寂寞懷舊幾躊躇雁過平沙迴煙銷大漠虛登臺

南望處掩淚對雙魚

行簡以瀘水羅賦得名其警句云焦螟之生必全有以小爲貴者江漢之流雖大可以一貫之又曰夕挂于壁如滿月之在天曉用于人狀圓荷之映水

行簡字知退敏而有詞元和二年登第爲度支郎中寶曆二年卒

行簡小字阿恰樂天同宿湖亭詩云潯陽少有風情客招宿湖亭盡卻迴水氣虛涼風月好夜深惟有阿恰來行簡恩賜章服樂天以詩寄之云吾年五十加朝散爾亦今年賜服章齒髮恰同知命歲官銜俱是客曹郎

兄子

弟年五十賜緋
俱是主客都官

榮傳錦帳花聯萼綵動綾袍鴈趁行大抵著緋宜老大莫

嫌秋鬢數莖霜

章孝標

孝標元和十三年下第時輩多爲詩以刺主司獨孝標爲歸鸞詩留獻侍郎庾承宣得詩展轉吟諷庾果重典禮曹孝標來年登第詩云舊壘危巢

泥已落今年故向社前歸連雲大厦無棲處更望誰家門戶飛

孝標及第除正字東歸題杭州樟亭驛云樟亭驛上題詩客一半尋爲山下塵世事日隨流水去紅花還似白頭人初成落句云紅花直笑白頭人改爲還似且曰我將老成名似我芳豔詎能久乎及還鄉而逝或曰前有八元後有孝標皆桐廬人復同姓而皆不達

李紳鎮揚州請孝標賦春雪詩命題於臺盤上孝標唯然索筆一揮云六出花飛處處飄黏窗拂砌上寒條朱門到晚難盈尺盡是三軍喜氣銷

孝標及第後寄紳曰及第全勝十改一作改官金鞍鍍了出長安馬頭漸入

揚州郭爲報時人洗眼看紳以一絕箴之曰假金方用真金鍍若是真金不鍍金十載長安得一第何須空腹用高心

歸海上舊居云鄉路遶蒹葭縈紆出海涯人衣被蜃氣鳥跡印鹽花草沒題詩石潮推坐釣槎還歸舊窗裏凝思賞煙霞

長安秋日云田家無五行水旱卜蛙聲牛犢乘春放兒孫候暖耕池塘煙

未起桑柘雨初晴歲晚香醪熟村村自送迎

右二詩章莊取入又玄集

明日鑿輿欲向東守宮金翠帶愁紅九門佳氣已西去千里花開一夜風

無題右張爲取作主客圖

孝標太和中山南東道從事試大理評事

施肩吾

肩吾洪州人元和十年登第以洪州西山羽化之地慕其真風高蹈於此
爲詩奇麗著百韻山居詩才情富瞻如荷翻紫蓋搖波面蒲瑩青刀插水
湄又煙黏薜荔龍鬚軟雨壓芭蕉鳳翅垂

贈邊將詩云輕生奉國不爲難戰苦身多舊箭瘢玉匣鎖龍鱗甲冷金鈴
襯鶻羽毛寒阜貂擁出花當背白馬騎來月在鞍猶恐犬戎臨虜塞柳營
時把陣圖看

上禮部侍郎陳情云九重城裏無親識八百人中獨姓施弱羽飛時攢箭
險蹇驢行處薄冰危晴天欲照盆難反貧女如花鏡不知卻向從來受恩

地再求青律變寒枝

贈友人下第閒居云花眼綻紅斟酒看藥心抽綠帶煙鋤皆輕巧之極
惜花云落盡萬株紅無人解繫風今朝芳徑裏惆悵錦機空

隋曲有疎勒鹽唐曲有突厥鹽阿鵲鹽或云關中人謂好爲鹽故肩吾詩
云顛狂楚客歌成雪媚嫵吳娘笑是鹽蓋當時語也今杖鼓譜中尙有鹽
杖聲

效古興云金雀無舊釵絳綺無舊裾惟有一寸心長貯萬里夫南軒夜蟲
織已促北牖飛蛾遶殘燭祇言衆口鑠千金誰信獨愁銷片玉不知歲晚
歸不歸又將啼眼縫征衣

夜宴曲云蘭缸如晝曉不眠玉爐夜起沈香煙青娥一行十二仙欲笑不
笑桃花然碧窗弄嬌梳洗晚戶外不知雲澤轉被郎嗔罰屠蘇

一作琉璃

盞酒

入四肢紅玉輦

肩吾有年來如拋梭不老應不得之句又及第後過揚子江詩云憶昔將

貢年抱愁此江邊魚龍互閃爍白浪高於天今日步青草還來經此道江神也世情爲我風色好右張爲取作主客圖

張籍贈詩云世閒漸覺無多事雖得空名未著身合取藥成相待喫不須先作上天人又送肩吾東歸云知君本是煙霞客被薦因來城闕閒世業偏臨七里瀨僊遊多在四明山早聞詩句傳人徧新得科名到處閒惆悵灞亭相送去雲中琪樹不同攀

鮑溶

歧路詩云北風送微寒徒侶勤遠程憂人席不煖殘月馬上明飄飄歧路閒長見日初生重嶂曉色淺疎猿寒啼清人閒多歧路常恐終身行迴見四方人車輪無留聲空谷亦堪隱下田非懶耕古人有遺訓飽食非親榮我生禮義鄉少小見太平聖賢猶羈旅況復非其名

長城作云蒙公虜生人北築秦氏冤禍興蕭牆內萬重防禍根城成六國亡宮闕啓千門生人半爲土何用空中原奈何家天下骨肉尙無恩投沙

擁海水安得不久翻乘高慘人魂寒日易黃昏枯骨貫朽鐵沙中如有言
萬古驪山葬誰知野火燔

秋暮山中寄李益端公云舊事與日遠秋花仍舊香前年繡衣客此節過
此堂侍臣不自高笑解繡衣裳眠雲有餘態入鳥不亂行我恐雲嵐色損
君鞍馬光君言此何言且共覆前觴古人重一笑買日輕金裝日盡秉燭
遊千年不能忘君言此何言明日皆異鄉明日非今日山下道路長平從
山下去天地再炎涼此期果難得夢君馬玄黃上策前遊古云險客不第
許渾過鮑溶宅有感云寥落故人宅重來身已亡古苔殘墨沼深竹舊書
堂秋色館池靜雨聲雲木涼無因展交道日暮倍心傷

溶登元和進士第與韓愈李正封孟郊友善陳思詩式願命光恩益繁再
溶有途中句云躍馬非壯歲報恩無高功斯言化爲火日夜焚深衷又上
太原王尚書云天王委管籥開閉奏北門頂戴日月光口宣雨露言又秋
懷句云萬里歧路多一身天地窄右張爲主客圖取溶爲工用博解宏拔

主

孟簡

惜分陰詩云業廣因功苦拳拳志士心九流難酌挹四海易消沈對景嗟
移晷窺園詎改陰三冬勞聚學駟景重兼金刺股情方勵偷光思益深再
中如可冀終嗣絕編音

元和中簡將試詣日者卜之曰近東門坐卽得之矣既入卽坐西廊迫晚
忽得疾隣生請與終篇見其姓卽東門也乃擢上第簡擬古云劍客不誇
怨主人知恥心但營纖毫義肯許千萬金勇則看鷲擊憤來聽虎吟平生
貴齷德刃敵無幽深

簡字幾道德州人元和中爲戶部侍郎以賊貶後以太子賓客分司卒尤
工詩尙節義

李程

程貞元中試日五色賦破題云德動天鑒祥開日華其卷已黜楊於陵薦

之主文呂渭於是已落重收

詠冰壺云琢玉性惟堅成壺體更圓虛心含衆象應物受寒泉溫潤資天質清真稟自然日融光自散雪映色逾鮮至鑿功寧宰無私照豈偏明將水鏡對白與粉闈連拂拭終爲美提攜佇見傳勿令毫髮累遺恨鮑公篇程字表臣爲翰林學士日過八磚乃至時號八磚學士寶曆三年爲相最爲帝所重曰高飛之翮長者在前卿朝廷羽翮也

張蕭遠 一作蕭遠

履春冰詩云一步一愁新輕輕恐陷人薄光全透日殘色半銷春蟬想行時翼魚驚躍處鱗底虛難駐足岸闊怯迴身豈暇踟躕久寧辭顧盼頻願將兢慎意從此越通津

觀燈云十萬人家火燭光門門開處見紅妝歌鐘喧夜更漏暗羅綺滿街塵土香星宿別從天畔出蓮花不向水中芳寶釵乘馬多遺落依舊明朝在路傍

蕭遠元和進士登第與舒元輿聲價俱美

出廣撫言

張籍有弟蕭遠雪夜同宿詩云數卷新遊蜀客詩長安僻巷得相隨草堂

深夜攜琴宿說似青城館裏時

秦雲寂寂僧還定盡日無人鹿遶牀句日暮風吹官渡柳白鴉飛出石頭

墻廢成句雙雙白燕入祠堂乳石洞玉女祠句右張為取作主客圖

許康佐

白雲起封中詩云英英白雲起呈瑞出封中表聖寧依地逢時豈待風浮

輝彌皎潔流影更沖融自叶堯天美誰言漢日同泥金光乍掩檢玉氣俄

通猶願非煙瑞亭亭不散空

一作張嗣初

元稹酬許五康佐詩云猿啼三峽兩蟬報兩京秋珠玉慙新贈芝蘭忝舊

遊他年問狂客須向老農求

康佐以中書舍人為翰林侍講學士與王起皆為文宗寵禮帝讀春秋至

闡殺吳子餘祭問闡何人耶康佐以中官方彊不敢對帝嘻笑後問李訓

訓曰國君不近刑人以爲輕死之道帝曰朕近刑人多矣得不慮哉訓曰
列聖知而不能遠惡而不能去陛下念之宗廟福也於是內謀翦除矣康
佐終於禮部尙書

許堯佐

金谷懷古云石氏遺文在淒涼見故園清風思奏樂衰草念行軒舞榭蒼
苔掩歌臺落葉繁斷雲歸舊壑流水咽新源曲沼殘煙斂叢篁宿鳥喧惟
餘池上月猶似對金樽

康佐諸弟皆第進士而堯佐最先進又舉宏詞爲太子授書郎八年康佐
繼之

堯佐貞元十六年與燉煌張宗本滎陽鄭權皆佐征西府後位諫議大夫
卒

張南史

陸滕宅秋雨中探韻云同人永日自相將深竹閒園偶辟疆已被秋風教

唐詩紀事

卷第四十一

六

無錫丁氏校刊

憶鱸更聞寒雨勸飛觴歸心莫問三江水旅服徒沾九月霜醉裏欲尋騎馬路蕭條幾處有垂楊

送朱大北遊云歲暮一爲別江湖聊自寬且無人事變誰謂客行難郢曲
恰公子皇州憶伯鸞蒼蒼遠山際松樹獨宜寒

南史好弈碁其後折節讀書遂入詩境李端哭之云諫草文猶在圍碁智
不如高仲武云張君奕碁者中年感激苦節學文數年間稍入詩境如已
被秋風教憶鱸更聞寒雨勸飛觴事與物力俱矣

錢起贈南史云紫泥何日到滄州笑向東陽沈隱侯黛色晴峯雲外出穀
紋江水縣前流使臣自欲論公道才子非關厭薄遊溪畔秋蘭雖可佩知
君不得少停舟

南史字季直幽州人以試參軍避亂居揚州再召未赴而卒

朱畫

贈友人古鏡云我有古時鏡初自壞陵得蛟龍猶泥蟠魑魅幸月蝕摩久

見菱蕊青於藍水色贈君將照心無使心受惑

喜陳懿老示新製云一別一千日一日十二憶苦心無閒時今夕見玉色

玉色復何異弘明含羣德有文如星宿飛入我胸臆憂愁方破壞歡喜重

補塞使我心貌全且非黃金力將攀下風手願假僊鸞翼

自注予欲見詩人孟郊故寄誠

此於

賦得花藤藥合寄穎陰故人云藤生南海濱引蔓青且長翦削為花枝何

人無文章非才亦有心割骨聞餘芳繁葉落何處孤貞在中央願盛黃金

膏寄與青眼郎路遠莫知意水深天蒼蒼

畫元和閒進士

侯喜

劉師服軒轅彌明

韓退之石鼎聯句云序云元和七年十二月四日衡山道士軒轅彌明舊

與進士劉師服衡湘中相識師服在京夜抵其居宿有校書郎侯喜新有

能詩聲夜與劉說詩彌明指爐中石鼎曰子能為我賦此乎喜即援筆賦

唐詩

紀事

卷第四十一

七

無錫丁氏校刊

之彌明繼焉詩曰妙匠斲山骨剗中事煎烹服師直柄未當權塞口且吞聲

喜龍頭縮菌蠹豕腹脹膨明彌外苞乾蘚文中有暗浪驚服師在冷足自安

遭焚意彌貞喜謬當鼎鼐閒妄使水火爭明彌大若烈士膽圓如戰馬纓服師

上比香爐尖下與鏡面平喜秋瓜未落蒂凍芋彊抽萌明彌一塊元氣閉細

泉幽竇傾服師不值輸寫處焉知懷抱清喜方當洪爐然益見小器盈明彌皖

皖無刃跡團團類天成遙疑龜負圖出曝曉正晴喜旁有雙耳穿上為孤

結撐明彌或訝短尾銚又似無足鐙服師可惜寒食毬擲在路傍坑喜何當出

灰地無計離瓶罌服師陋質荷斟酌狹中愧提擎服師豈能煮仙藥但來汚羊

羹喜形模婦女笑量度兒童輕明彌徒示堅重性不過升合盛傍似廢轂仰

側見折軸橫喜時於蚯蚓竅微作蒼蠅鳴明彌以茲翻溢倦實負任使誠服師

常居顧盼地敢有漏泄情寧依暖熱弊不與寒涼并明彌區區徒自効瑣瑣

不足呈服師迴旋但兀兀開合唯鏗鏗喜全勝瑚璉貴空有口傳名豈此俎

豆古不為手所橙磨礪去圭角浸潤著光明願君莫嘲諛此物方施行韻四

并是彌明作也

始師服援筆題首句授喜喜綴其下云云道士笑曰子詩如是而已乎卽袖手竦肩膀北墻坐謂劉曰吾不解世俗書弟子爲我書吾句因高吟龍頭豕腹一聯初不似經意詩旨有似譏喜二子相顧慙駭欲以多窮之道士不用意益切奇出不可附說語皆侵劉侯二子思竭不能續道士曰章不可不成命劉把筆唱出四十字爲八句讀畢謂二子曰此皆不足與語此寧爲文耶吾所聞子皆不足聞也二子驚惋自失

蔣防

春風扇微和詩云麗日催遲景和風扇早春暖浮丹鳳闕韶媚黑龍津澹蕩迎仙仗霏微送畫輪綠搖官柳散紅侍禁花新舞席皆迴雪歌筵暗起塵幸當陽律候惟願及佳辰

或作公乘億

望禁苑祥光詩云嘉瑞生天色蔥蘢效祥樹搖二殿側日映九城傍僊霧今同色卿雲未可章橫汾疑鼎氣臨渭比榮光豈竝春風舊俄同聖壽長微臣時一望短羽欲翱翔

冬至日祥風應候詩云節逢清景空占氣二儀中獨喜登高日先知應候風呈祥光舜化表慶感堯聰況與承時叶還將入律同微微萬井逼習習

九門通遶殿起煙起殷勤報歲功

或作穆寂

杜賓客永豐里新居云退蹟居三逕辭榮繼二疏聖情容解印帝里許懸車已去龍樓籍猶分御廩儲風泉輸耳目松竹助玄虛調護心常在山林思有餘應嗤紫芝客遠就白雲居

元和中李紳及防薦龐嚴為翰林學士李逢吉誣紳罪逐之出嚴刺信州防刺汀州于敖封還詔書搢紳意伸其枉曰于結事犯宰執之怒申龐蔣之屈不亦善乎奏下乃論貶嚴太輕衆嗤譟防作連州廖先生碑銘云長慶末余自尚書司封郎中知制誥翰林學士出守臨汀尋改此郡

唐詩紀事卷第四十一

唐詩紀事卷第四十二

王涯

令狐楚

張仲素

王涯

獻壽詩云宮觀參差列九重祥雲瑞氣捧階濃微臣欲獻南山壽遙指南山對袞龍

遊春詩云曲江絲柳變煙條寒谷冰隨暖氣銷纔見春光生綺陌已聞清樂動雲韶又云經過柳陌與桃蹊尋逐春光逐處迷鳥度時時衝絮起花

繁袞袞壓枝低

或作王維

秋思云網軒涼吹動輕衣夜聽更長玉漏稀月渡天河光轉溼鵲驚秋樹葉頻飛又云宮連太液見滄波暑氣微消秋意多一夜輕風蘋末起露珠翻盡滿池荷

從軍詞云旄頭夜落捷書飛來奏金門著賜衣白馬將軍頻破敵黃龍戍幾卒時歸

塞下曲云辛勤幾出黃花戍迢遞初隨細柳營塞晚每愁殘月苦邊秋更
逐斷蓬聲又云年少辭家從冠軍金裝寶劍去邀勳不知馬骨傷寒水惟
見龍城起暮雲

或作
王維

平戎詞云太白秋高助發兵長風夜卷虜塵清男兒解卻腰閒劍喜見從

王道化平

或作
王維

又云塞虜常爲敵邊聲已報秋平生多志氣箭底覓封侯

從軍詞云戈甲從軍久風雲識陣難今朝拜韓信計日斬成安又云燕領
多奇相狼頭敢犯邊寄言班定遠正是立功年

隴上行云負羽到邊州鳴笳度隴頭雲黃知塞近草白見邊秋

閨人寄遠云花明綺陌春柳拂御溝新爲報遼陽客流芳不待人又云遠
成功名薄幽閨年貌傷妝成對春樹不語淚千行又云形影一朝別煙波
千里分君看望君處祇是起行雲又云戴勝飛晴野凌澌下濁河春風樓
上望誰見淚痕多

春江曲云搖漾越江春相將看白蘋歸時不覺夜出浦月隨人又云家寄
征江岸征人幾歲遊不如潮水信每日到沙頭又云乘曉南湖去參差疊
浪橫前洲在何處露裏雁嚶嚶

塞下曲云三伐漁陽再度遼駢弓在臂劍橫腰匈奴似欲知名姓休傍陰
山更射鵬又云獵馬千羣雁幾雙燕然山下碧油幢傳聲漠北單于破火
照旌旗夜受降又云朔風飄飄開雁門平沙歷亂卷蓬根功名恥計擒生
數直斬樓蘭報國恩又云隴水潺湲隴樹秋征人到此淚雙流鄉關萬里
無因見西戍河源早晚休又云陰磧茫茫塞草腓桔槔烽上暮煙飛關河
北望天連海蘇武曾將漢節歸

或作張仲素

漢苑行云二月春風變柳條九天清樂奏雲韶蓬萊殿後花如錦紫閣堦
前雪未消又云迴雁高翻太液池新花低發上林枝年光到處皆堪賞春
色人閒總未知又云春風澹蕩影悠悠鶯轉高枝燕入樓千步迴廊聞鳳
吹珠簾處處上銀鈎

閨思云洞房今夜月如練復如霜爲照離人恨亭亭到曉光

涯字廣津博學工屬文梁肅陸贄異其才元和中爲相又相穆宗至文宗時李訓敗遂及禍

令狐楚

宮中樂云楚塞金陵靖巴山玉壘空萬方無一事端坐大明宮又云雪霽長楊苑冰開太液池宮中行樂日天下盛明時又云柳色煙相似梨花雪不如春風空有意一一麗皇居又云月上宮花靜煙含苑樹深銀臺門已閉仙漏夜沈沈又云九重青鎖闥百尺碧雲樓明月秋風起珠簾上玉鈎遠別離云楊柳黃金穗梧桐碧玉枝春來消息斷早晚是歸時又云玳織鴛鴦履金裝翡翠簪畏人相借問不擬到城南

遊春辭云曉遊臨碧殿晚日上春亭芳樹羅仙仗晴山展翠屏又云一夜好風吹新花一萬枝風前調玉管花下簇金羈

長相思云君行登隴上妾夢在閨中玉筍千行落銀牀一半空又云綺府

春眼覺紗窗曉望迷朦朧殘夢裏猶自在遼西

少年行云少小邊城慣放狂驕騎蕃馬射黃羊如今年老無筋力猶倚營
門數雁行又云家本清河住五城須憑弓箭覓功名等閒飛鞚秋原上獨
向寒雲試射聲又云弓背霞明劍照霜秋風走馬出咸陽未收天子河源
地不擬回頭望故鄉又云雪滿庭中月滿樓金尊玉柱對清秋當年稱意
須爲一作行樂不到天明未肯休

從軍行云荒雞隔水啼汗馬向風嘶終日隨旌旆何年罷鼓鼙又云孤心
眠夜雪滿眼是秋沙萬里猶防塞三年不見家又云卻望冰河闊前登雪
嶺高征人幾多在又擬戰臨洮又云胡風千里驚漢月五更明縱有還家
夢猶聞出塞聲又云暮雪迷青海陰霞覆白山可憐班定遠生入玉門關
塞下曲云雪滿衣裳冰滿鬚曉隨飛將伐單于平生志氣今何在把得家
書淚似珠又云邊草蕭條塞雁氣征人南望盡霑衣黃塵滿面長須戰白
髮生頭未得歸

思君恩云小苑鶯歇歌長門蝶舞多眼看春又去翠輦不經過又云紫禁
香如霧青天月似霜雲韶何處奏祇是在昭陽又云鷄鳴天漢曙鶯語禁
林春誰入巫山夢惟應洛水神

王昭君云錦衣天外去毳幕雪中開魏闕蒼龍遠蕭關赤雁來又云仙娥
今下嫁驕子自同和劍戟歸田盡牛羊繞塞多

望春辭云高樓望見一花開便覺春光四面來曉月晴雲知次第東風不
用便相催又云雲霞五彩浮天闕梅柳千般夾御溝不上黃山南北望豈
知春色滿神州

楚久爲太常博士詩云何日居三署終年尾百寮世傳之立春後言懷招
汴州李庭一作匡衙推云閒齋夜擊唾壺歌試望夷門奈遠何每聽塞笳離

夢斷時窺清鑑旅愁多稍驚宵漏丁丁促已覺春風習習和海內故人君
最老花閒鞭馬更相過

節度宣武酬樂天夢得云蓬萊仙監樂天客曹郎劉爲曾枉高車客大梁見

擁旌旄治軍旅知親筆硯事文章愁看柳色懸離恨憶遞花枝助酒狂洛
下相逢肯相寄南金瑾錯玉淒涼劉詩云曾經謝病客遊梁今日相逢憶
李王少有一身兼將相更能四面占文章白詩云馬頭拂柳時回轡豹尾
穿花暫亞槍誰引相公開口笑不逢白傅與劉郎

楚自翰林學士拜相子緇自湖州召入翰林爲學士閒歲拜相渭南尉趙
嘏獻詩曰鶚在青雲冰在壺代天才業奉訃謨榮同伊陟傳朱戶秀比王
商入畫圖昨夜星辰回劍履前年風月滿江湖不知機務時多暇猶許詩
家屬和無

貞元七年杜黃裳知舉微服訪名士於尹樞樞言子弟有崔茂略孤進有
林藻令狐楚其年樞冠榜試珠還合浦賦藻賦成夢人謂曰何不敍珠來
去之意既寤改之黃裳謂藻曰敍珠來去如有神助是年楚第五藻第十

一

楚字穀士德棻之裔與李逢吉善元和末爲相敬宗逐李紳楚自宣武節

度徙天平入爲左僕射開成閒卒楚遊義興寺寄上李逢吉相公云柳營
無事詣蓮宮

相公久住此寺

步步猶疑是夢中勞役徒爲萬夫長閒遊曾與二人

同鳳鸞飛去仙巢在龍象潛來講席空松下花飛頻佇立一心千里憶梁
公

遊晉祠上李逢吉相公云不歷晉祠三十年白頭重到一淒然泉聲自昔
鏘寒玉草色雖秋耀翠鈿少壯同遊甯有數尊榮再會便無緣相思臨水
下雙淚寄入并汾向洛川

張仲素

聖神樂云玉帛殊方至歌鐘比屋聞華夷今一貫同賀聖明君又云海浪
恬舟徼邊塵靜黑山從今萬里外不復鎖蕭關又云九陌祥煙合千春瑞

月明宮花同

一作將

苑柳先發鳳皇城

文章自昔云

宮樂云網戶交如綺紗窗薄似煙樂吹天上曲人是月中仙又云翠匣開
寒鏡珠釵挂步搖妝成祇畏曉更漏促清宵又云紅果瑤池實金盤露井

冰甘泉將避暑臺殿水光凝又云月彩浮鸞殿砧聲遶鳳樓笙歌臨水檻
紅燭乍迎秋又云奇樹留寒翠神池結夕波黃山一夜雪渭水雁聲多

春遊曲云煙柳飛輕絮風榆落小錢濛濛百花裡羅綺競鞦韆又云行樂

三春節林花百和香當年重意氣先占鬪雞場又云騁望臨香閣登高下

砌臺砌臺即今
撥撥臺也林閒踏青去席上意錢來

春閨怨云雪盡萱抽葉風輕水變苔玉關書信絕又見發庭梅又云裊裊

邊城柳青青陌上桑提籠忘採葉昨夜夢漁陽

又云桂魄初生秋露微輕羅已薄未更衣銀箏夜久殷勤弄心怯空房不

忍歸

太平辭云風俗今和厚君王在穆清行看採花曲盡是泰階平又云聖德

超千古皇風靜四方蒼生今息戰無事覺時長

遊春曲云萬樹江邊杏新開一夜風滿園深淺色照在綠波中又云上苑

何窮樹花開次第新香車與絲綺風靜亦生塵

送春辭云日日人空老年年春更歸相歡在尊酒不用惜花飛

塞上曲云天驕遠塞行出鞘寶刀鳴定是酬恩日今朝覺命輕

又云卷旆生風喜氣新早持龍節靜邊塵漢家天子圖麟閣自是當今第一人

贈遠云當年只自守空帷夢見江山覺別離不見鄉書傳雁足唯看新月吐蛾眉又云厭攀楊柳臨青閣閒採芙蓉傍碧潭走馬臺邊人不見拂雲堆畔戰方酣

閨人思云愁見游空百丈絲春風惹斷更傷離閒花落徧蒼苔地盡日無人誰得知

秋夜曲云丁丁漏水夜何長漫漫輕雲露月光秋逼暗蟲通夕響征衣未寄莫飛霜又云碧窗斜月藹清輝愁聽寒蛩淚溼衣夢裏分明見關塞不知何路向金微又云秋天一夜靜無雲斷續鴻聲到曉聞欲寄征衣問消息居延城外又移軍又云博山沈燎絕餘香蘭燼金檠怨夜長爲問青青

河畔草幾回經雨復經霜

天馬辭云天馬初從渥水來郊歌曾唱得龍媒不知玉塞沙中路苜蓿殘
花幾處開又云蝶躑宛駒齒未齊拵金噴玉向風嘶來時行盡金河道獵
獵輕風在碧蹄

緱山鶴詩云羽客驂仙鶴將飛駐碧山映松殘雪在度嶺片雲還清唳因
風遠高姿對水閒笙歌憶天上城郭歎人閒幾變霜毛潔方殊藻質斑迢
迢煙路逸奮翮詎能攀

仲素字繪之建封之子憲宗以仲素段文昌爲翰林學士韋賢之曰學士
所以備顧問不宜專取辭藝罷之後終中書舍人

右王涯令狐楚張仲素五言七言絕句共作一集號三舍人集今盡錄于
此

唐詩記事卷第四十三

竇參

郎士元

于良史

舒元興

李諒

李賀

呂溫

呂恭

段洪古

何元上

羊士諤

馮宿

柳宗元

吳武陵

邵真

崔膺

衛象

李宣遠

熊孺登

崔立之

郭遵

章紆

竇參

遷謫江表久未歸詩云一自經放逐徘徊無所從便爲出山雲不得隨飛龍名豈不欲保歸豈不欲早苟無三月資難適千里道離心與羈思終日常草草人生年幾齊憂苦卽先老誰能假羽翼使我暢懷抱

湖上閒居云避影將息陰自然知音稀向來深林中偶亦有所窺飛鳥口銜食引雛上高枝高枝但各有安知宜不宜止止復何云物情何自私高仲武云參詩祖沈千運比於孟雲卿尙在廊廡之間然萬丈水聲落四

時松色寒又人生年幾齊憂苦卽先老羽翮未齊而筋骨已具
參字時中爲人矜嚴悻直果於斷初爲萬年尉失囚貶尉江夏代同舍人
罪人義之相德宗與陸贄不平以姦賄貶賜死邕州

郎士元

題劉相公三湘圖云昔別醉衡霍爾來憶南州今朝平津邸兼得瀟湘遊
稍辨荆門樹依然芳杜洲微明三巴峽咫尺萬里流去鳥不知倦遠帆生
暮愁潯陽指天末北渚空悠悠枕上見漁父坐中常狎鷗誰言魏闕下自
有東山幽

塞下曲云寶刀塞上兒身經百戰曾百勝壯心竟未嫖姚知百草山頭日
初沒黃沙城下聲歌發蕭條夜靜邊風吹獨倚營門望秋月

贈韋司直云聞君感歎二毛初舊友相依萬里餘烽火有時驚暫定甲兵
無處可安居客來吳越星霜久家在平陵音信疏昨日秋風還入戶登山
臨水意如何

送張南史云雨餘深巷靜獨酌送殘春車馬雖嫌僻鶯花不棄貧蟲聲黏
戶網鼠跡印牀塵借問山陽會如今有幾人

高仲武云士元員外河岳英奇人倫秀異自家刑國遂擁大名右丞已後
與錢郎更長自丞相已下出使作牧二公無詩祖餞時論鄙之兩公詞體
大約欲同就中郎公稍更閒雅近於康樂如荒城背流水遠雁入寒雲又
去鳥不知倦遠帆生暮愁又蕭條夜靜邊風吹獨倚營門望秋月可齊衡
古人掩映時輩又暮蟬不可聽落葉豈堪聞古人謂謝朓工於發端比之
於今有慙沮矣

送彭將軍云雙旌漢飛將萬里授橫戈春色臨關盡黃雲出塞多鼓鞞悲
絕漠烽戍隔長河想到陰山路天驕已請和

送孫頤云悠然富春客憶與暮潮歸擢第人多羨如君獨步稀亂流江渡
淺遠色海山微若訪新安路嚴陵有釣磯

宿杜氏江樓云適楚豈無願思歸秋向深故人江樓月永夜千里心落葉

集

攪鄉夢鳥啼驚越吟寥寥更何有斷續空城砧

送彭將軍以下三章并贈張南史詩姚合取爲極玄

士元字君胄中山人寶應中選畿縣官詔試中書補渭南尉歷拾遺郢州刺史

于良史

良史爲張徐州建封從事每自吟日出身三十年髮白衣猶碧日暮倚朱門從朱污袍赤公因爲奏章服焉

春山夜月云春來多勝事賞翫夜忘歸掬水月在手弄花香滿衣興來無遠近欲去惜芳菲南望鐘鳴處樓臺深翠微

冬日寄李贊府云地附朝陽滿天邊宿霧收風兼殘雪起河帶斷水流北闕馳心極南圖尙旅游登臨思不已何處得銷憂

閒居寄薛據云隱几讀黃老閒齋耳目清僻居人事少多病道心生雨洗山林溼鴉鳴池館晴晚來因廢卷行樂至西城

高仲武云良史詩清雅工於形似如風兼殘雪起河帶斷冰流吟之未終皎然在目

舒元輿

太和九年誅王涯等仇士良愈專恣文宗惡之雖登臨遊幸未嘗爲樂或瞠目獨語左右莫敢進問因題詩曰輦路生春草上林花滿枝憑高何限意無復侍臣知一日看牡丹或吟曰拆者如語含者如咽俯者如愁仰者如悅吟罷方省元輿詞不覺歎息泣下霑衣

李翱在長沙嫁韋中丞愛姬所生女之流落者元輿自京馳詩贈翱曰湘江舞罷忽成悲便脫鸞靴出絳帷誰是蔡邕琴酒客魏公懷舊嫁文姬元輿婺州人與李訓善同相文宗專附鄭注詭謀謬算日與訓比敗天下事二人爲之也

元輿授監察御史時坊州刺史汪洙黷貨御史大夫溫造署元輿往訊之於坊州按獄有詩云中部接戎塞頑山四周遭風冷木長瘦石磽人亦勞

牧守苟懷仁癢之時爲搔其愛如赤子始得無啼號奈何貪狼心潤屋沈
脂膏攫搏如猛虎吞噬若狂獒山秃逾高採水窮益深撈龜魚既絕跡鹿
兔無遺毛氓苦稅外緡吏憂笑中刀大君明四目燭之洞秋毫眷茲一州
命慮齊墜波濤臨軒詔小臣汝往窮貪饕分明舉公法爲我緩窮騷小臣
誠小心奉命如煎熬飲冰不待夕驅馬凌晨皋及此督簿書游詞出狴牢
門牆見狼狽案牘聞腥臊探情與之言變態如姦穢眞非旣巧飾僞意乃
深韜去惡如農夫稂莠須耘薙恢恢布疏網罪者何由逃自顧孱鈍姿利
器非能操六旬始歸奏霜落秋原蒿寄謝守土臣努力清郡曹須知聽甚
卑勿謂天之高

橋山懷古云軒轅厭代千萬秋淥波浩蕩東西流今來古往無不死獨有
天地長悠悠我乘驛騎到中部古聞此地爲渠搜橋山突兀在其左荒榛
交鎖寒風愁神仙天下亦如此況我蹙促同蜉蝣誰言衣冠葬其下不見
弓劍何人收哀喧叫笑牧童戲陰天月落狐狸遊卻思皇墳立人極車輪

馬跡無不周洞庭張樂降玄鶴涿鹿大戰摧蚩尤知勇神天不自大風后
力牧輸長籌襄城迷路問童子帝鄉歸去無人留崆峒求道失遺跡荆山
鑄鼎餘荒丘君不見黃龍飛去山下路斷髯成草風颼颼

八月五日中部官舍讀唐曆天寶已來追愴故事云將尋國朝事靜讀柳
芳曆八月日之五開卷忽感激正當天寶末撫事坐追惜仰思聖明帝貽
禍在肘腋楊李盜吏權貪殘日狼籍燕戎伺其便百萬奮長戟兩河連煙
塵二京成瓦礫生人死欲盡楔業猶不息肅宗傳寶圖寇難連年擊天地
方開泰鑄鼎成繼述萬國哭龍衰悲思動蠻貊自此千秋節不復動金石
悲風揚霜天總帷冷塵席零落太平老東西亂離客往往爲余言嗚咽淚
雙滴況當近塞地哀吹起邊笛撫几觀陳文使我心不懌花萼笑繁華溫
泉樹容碧霓裳煙雲盡梨園風雨隔露囊與金鏡東游驚波湧昔聞歡娛
事今日成慘戚神仙不可求劍璽苔文積萬古長恨端蕭蕭泰陵陌
坊州按獄蘇氏莊記室二賢自鄜州走馬相訪留連數日發後獨坐寂寞

因成詩寄之云十年一相見世路信多歧雲雨易分散山川長間之我銜
鳳闕恩按獄橋山陞君在龍驤府掌奏羽檄詞相去百餘里魂夢自相馳
形容在腦臆書札通相思煩君愛我深輕車忽載脂塞門秋色老霜氣方
凝姿此地少平川岡阜相參差誰知路非遠行者多云疲君能犯勁風信
宿凌欹危情親不自倦下馬開雙眉相對坐沈吟屈指驚歲時萬事且莫
問一杯欣共持陽烏忽西傾明蟾挂高枝卷簾引瑤玉滅燭臨霜墀中庭
有疏蘆淅淅聞風吹長河卷雲色凝碧無瑕疵一言開我懷曠然澹希夷
悠然夜方永冷思偏相宜眉睫無他人與君閒解題陶然叩寂寞更請吟
清詩得意且忘言何況竹與絲頃刻過三夕起坐輕四肢明朝告行去慘
然還別離出門送君去君馬揚金羈迴來坐空堂寂寞無人知重重碧雲
合何處尋佳期

李諒

蘇州元日郡齋感懷寄越州元相公杭州白舍人云稱慶還鄉郡吏歸端

憂明發儼朝衣首開三百六旬曆新知四十九年非當官補拙猶勤慮遊
宦量才已息機舉族共資隨月俸一身惟憶故山薇舊交邂逅封疆近老
牧蕭條宴賞稀書札每來同笑語篇章時到借光輝絲綸暫厭分符竹舟
楫初登擁羽旂未知今日情何事應與幽人事有違
時長慶四年也
樂天和李中丞元日寄詩兼呈微之云領郡慙當潦倒年隣州喜得平生
友又云憑鶯傳語與李六倩雁將書寄元九莫歎一日日催人且貴一年
年入手

樂天草諒泗州刺史制云諒自澄城長訖尙書郎中間再爲州牧三宰劇
縣苦心卹隱仁恕及物操刃決滯耑騶有聲諒後爲京兆尹

諒字復言微之有酬復言元日郡齋感懷詩云臘盡殘銷春又歸逢新別
故欲沾衣自驚身上添年紀休繫心中小是非富貴祝來何所遂聰明鞭
得轉無機羞看稚子先拈酒悵望平生舊采薇去日漸加餘日少賀人閒
鬧故人稀椒花麗句開重檢艾髮衰容惜寸輝苦思正宜酬白雪閒觀風

色助青旂千官仗下爐煙裏東海西頭意獨違

祝富貴鞭聰明皆正旦童稚故云

李賀

高軒過云華裙織翠青如蔥金環壓轡搖玲瓏馬蹄隱耳聲隆隆入門下
馬氣如虹云是東京才子文章鉅公二十八宿羅心胸元精耿耿貫當中
殿前作賦聲摩空筆補造化天無功龐眉書客感秋蓬誰知死草生華風
我今垂翅附冥鴻他日不羞蛇作龍

韓退之皇甫湜聯騎造門賀總角荷衣而出此詩操觚立成

賀以詩謁退之時爲國子博士已送客解帶門人呈卷旋讀之首篇雁門
太守行云黑雲壓城城欲摧甲光向日金鱗開卻束帶命邀之其詩云黑
雲向城城欲摧甲光向日金鱗開角聲滿天秋色裏塞上胭脂凝夜紫半
卷紅旗臨易水霜重鼓聲寒不起報君黃金臺上意提攜玉龍爲君死
李作隱作賀小傳云京兆杜牧爲李長吉集序狀長吉之奇甚盡世傳之
長吉姊嫁王氏者語長吉之事尤備長吉細瘦通眉長指爪能苦吟疾書
最先爲昌黎韓愈所知所與遊者王參元楊敬之權璩崔植爲密每旦日

出與諸公遊未嘗得題然後爲詩如他人思量牽合以及程限爲意常從
小奚奴騎距驢背一古錦囊遇有所得卽書投囊中及暮歸太夫人使婢
探囊出之見所書輒曰是兒要當嘔出心始已耳上燈與食長吉從婢取
書研墨疊紙足成之投他囊中非大醉及弔喪日率如此過亦不復省王
楊輩時復來探取寫去長吉往往獨騎往還京洛所至或時有著隨棄之
故沈子明家所餘四卷而已長吉將死時忽晝見一緋衣人駕赤虬持一
版書若太古篆或霹靂石文者云當召長吉長吉了不能讀歛下榻叩頭
言阿嬾長吉學語時呼太夫人云老且病賀不願去緋衣人笑曰帝成白玉樓立召君
爲記天上差樂不苦也長吉獨泣邊人盡見之少之氣絕常所居窗中勃
勃有煙氣聞行車嘒管之聲太夫人急止人哭待之如炊五斗黍許時長
吉竟死王氏姊非能造作謂長吉者實所見如此嗚呼天蒼蒼而高也上
果有帝耶帝果有苑囿宮室觀閣之玩耶苟信然則天之高邈帝之尊嚴
亦宜有人物文彩愈此世者何獨眷眷於長吉而使其不壽耶噫又豈世

所謂才而奇者不獨地上少耶天上亦不多耶長吉生二十七年位不過奉禮太常當時人亦多排擯毀斥之又豈才而奇者帝獨重之而人反不重耶又豈人見會勝帝耶

飛香芝紅滿天春

上雲樂句

酒酣喝月使倒行

句

踢天磨刀割紫雲

此硯句

右張

爲取作主客圖

杜牧之序其文集云賀字長吉元和中韓吏部亦頗道其歌詩雲煙綿聯不足爲其態也水之迢迢不足爲其情也春之盎盎不足爲其和也秋之明潔不足爲其格也風檣陣馬不足爲其勇也瓦棺篆鼎不足爲其古也時花美女不足爲其色也荒國侈殿梗莽丘壠不足爲其恨怨悲愁也鯨吐鼈擲牛鬼蛇神不足爲其虛荒幻誕也蓋騷之苗裔理雖不及辭或過之騷有感怨刺懟言及君臣理亂時有以激發人意乃賀所爲無得有是賀能探尋前事所以深歎恨今古未嘗經道者如金銅仙人辭漢歌補梁肩吾宮體謠求取情狀離絕遠去筆墨畦逕間亦殊不能知之賀生二十

七年死矣世皆曰使賀且未死少加以理奴僕命騷可也

呂溫

字和叔一字化光禮部侍郎渭之子貞元中連中四科德宗召爲集賢校書後爲治書侍御史坐王叔文貶道州改衡州年四十而歿有子安衡和張舍人聞琴云迢遞天上直寂寞丘中琴憶爾山水韻起予仁智心凝情在正始超想疏煩襟涼生子夜後月照禁垣深遠風藹蘭氣微露清桐陰方襲緇衣慶永奉南薰吟

贈友人云南山雙喬松擢本皆千尋夕流膏露津朝被青雲陰負雪出深澗搖風倚高岑明堂久不構雲幹何森森匠意方雕巧時情正誇淫生材會有用天地豈無心

道州觀野火詩云南風吹烈火燄燄燒楚澤陽景當晝連陰天半夜赤過處若葦埽來時如電激豈復辨蕭艾焉得分玉石蟲蛇盡燦爛虎兕出奔迫積穢一蕩除和氣始融液堯時旣敬授禹稼斯肇迹徧生合穎禾大秀

兩歧麥家有京坻詠人無溝壑感若悟焚如功來歲終受益

衡州早春云碧水何逶迤東風吹春草煙波千里曲不辨嵩陽道又云病肺不飲酒傷心不看花唯驚望鄉處猶自隔長沙

孟冬蒲津關河亭作云息駕非窮途未濟豈迷津獨立大河上北風來吹人雪霜自茲始草木當更新嚴冬不肅殺何以見陽春

有偶然作云悽悽復汲汲忽覺年四十今朝淚滿衣不是傷春泣又云中夜兀然坐無言空涕洟丈夫志氣事兒女安得知可以見其志也

劉夢得序其文曰蚤聞詩禮於先侍郎從梁肅學文章勇於藝能咸有所祖年益壯志益大遂撥去文學與雋賢交重氣槩覈名實歆然以致君及物爲大欲每於其徒講疑考要皇王霸強之際臣子忠賢之道出入上下千百年閒詆訶角逐疊發連拄得一善輒盱衡擊節揚袂頓足信容得色舞于眉端以爲按是言修是理合乎心而氣將之昭晤然若揭日月而行孰能闕其勢而爭天光者嗚呼言可信而時異道甚長而命窄精氣爲物

其有所歸乎又曰和叔年少遇君而卒以謫似賈生能明王道似荀卿始學左氏書故其文微爲富豔夫羿之關弓唯巴蛇九日乃能盡其力而迴注鷁爵亦要中於尋常之間非羿之手弓有能有不能所遇然也後之達解者推而廣之知余之素交不相索於文字之內而已其序如此是以夢得元微之柳子厚悼呂衡州詩并誄皆以溫功業未濟爲辭

夢得詩曰一夜霜風彫玉芝蒼生望絕士林悲空懷濟世安人略不見男婚女嫁時遺草一函歸太史旅墳三尺近要離朔方徙歲行將滿欲爲君刊第二碑

微之詩云氣敵三人傑交深一紙書我投冰瑩眼君報水憐魚腥股唯夸瘦膏盲豈暇除傷心死諸葛憂道不憂餘又云望有經綸鈞虔收宰相刀江文駕風遠雲貌接天高國待球琳器家藏虎豹韜盡將千載寶埋入五原蒿又云白馬雙旌隊青山八陣圖請纓期繫虜枕草誓捐軀勞激三千壯年應四十無遙聞不瞑目非是不憐吳又云鷗鷺生難敵沈檀死更香

兒童喧市井羸老哭碑堂雁起沙汀暗雲連海氣黃祝融峯上月幾照北人喪

子厚作誄云元和六年八月日衡州刺史東平呂君卒君由道州以陟爲衡州君之卒二州之人哭者逾月湖南人重社飲酒是月上戊不酒去樂會哭於神所而歸君之志與能不施于生人知之者又不過十人徒讀君之文章歌君之理行不知二者之于君其末也萬不試而一出焉猶爲當世甚重使君幸得出其什二三巍然爲偉人與世無窮其可涯也

呂恭

呂溫春日與李六景儉及弟恭聯句景儉云始見花滿枝又見花滿地溫云且持增氣酒莫滴傷心淚恭云深誠長鬱結芳辰自妍媚景儉云笑歌聊永日誰知此時意溫又有同恭歲暮寄晉州李協律詩其略曰伊我抱微高仲氏卽心期討論自少小形影相差池北來胸中氣欲耀天下奇雲衢兩沛艾煙閣雙萎蕤幾年困方柄一旦失多歧道因窮理悟命以盡性

知皆失志之狀也呂渭四子溫恭儉遜柳宗元誌恭墓云以爲賢豪絕人又云恭之妻裴延齡女也

段洪古

洪古澧州人呂溫守道州時洪古客焉洪古奉陪郎中使君樓上夜把火看花詩云城上芳園花滿枝城頭太守夜看時爲報林中高舉燭感人情思欲題詩溫答段秀才云盡日看花君不來江城半夜爲君開樓中共指南園大紅燼隨花落碧苔

溫送段秀才歸澧州云湘南孤白芷幽託在清潯豈有馨香發空勞知處深推賢路已隔賑乏力不任慙我一言分負君千里心寸義薄聯組片誠敵兼金方期踐冰雪無使弱思侵

何元上

呂溫知道州時元上居此州謂之何處士

元上有所居寺院涼夜書情呈呂溫云庾公念病宜清暑遣向僧家占上

方月光似水衣裳溼松氣如秋枕簟涼幸以薄才當客次無因弱羽逐鸞
翔何由一示雲霄路腸斷星星兩鬢霜

溫答云意氣曾傾四國豪偶來幽寺息塵勞嚴陵釣處江初滿梁甫吟時
月正高新識幾人知杞梓故園何歲長蓬蒿期君自致青雲上不用傷心
歎二毛

溫又有送何山人之容州詩云匣有青萍笥有書何門不可曳長裾應須
定取真知者遣對明君說子虛

羊士諤

小園春至偶書呈竇郎中孟員外云松篠雖苦節冰霜慘其聞欣欣發佳
色如喜東風還幽抱想前躅冥鴻度南山春臺一以眺達士亦解顏偃息
非詩圃沈吟闕玄關馳暉忽復失壯歲不得閒君子當濟物丹梯難共攀
心期自有約去掃蒼苔斑

酬西川獨孤侍御見寄云百雉層城上將壇列營西照雪峯寒文章立事

須銘鼎談笑論功恥據鞍草檄青油推健筆曳裾黃閣聳危冠雙金未比
三年字負弩空慙知者難

亂後曲江云憶昔曾遊曲水濱春來長有探春人遊春人靜空地在直至
春深不似春

順宗實錄云元年六月貶宣州巡官羊士諤爲汀州甯化縣尉士諤性傾
險時以公事至京遇叔文用事朋黨相煽頗不能平公言其非叔文聞之
怒欲下詔斬之執誼不可則令杖殺之又不可遂貶焉由是叔文始大惡
執誼士諤受知李吉甫又最善呂溫薦爲御史嘗爲資州刺史

望女几山早歲有卜築之志云女几山頭春雪銷路旁仙杏發柔條心期
欲去知何日惆悵迴車上野橋

酬蕭使君出妓夜讌見送云玉顏紅燭忽驚春微步凌波暗拂塵自是當
歌斂眉黛不應惆悵爲行人

郡樓晴望云霽色朝雲盡亭高露亦稀寒開臨曲檻蕭瑟換輕衣地遠秦

人望天晴社燕飛無功慙歲晚唯念故山歸

息州荆溪入陽羨南山遊善權寺呈李功曹云結纜蘭渚曉挈侶上連岡
晏溫值初霽去遶山河長獻歲冰雪盡細泉在路傍行披煙杉入激瀾橫
石梁層門表精廬飛蠶切雲翔冲襟得高步清眺極遠方潭嶂積佳氣蕙
英多早芳具觀澤國秀重使春心傷念遵煩促途榮利鶩隙光勉君脫冠
意共匿無何鄉

尋山家云獨訪山家歇還涉茅屋斜連隔松葉主人聞語未開門繞籬野
菜飛黃蝶

張爲主客圖以樂天爲廣大教化主士諤爲入室取其句云風泉留古溜
笙磬想遺音

歷山句

桂朽有遺馥鸞飛安可待

句

塵沙藹如霧長波驚颿度

雁起汀洲寒馬嘶高城暮銀缸倦秋館綺瑟瞻永路重有攜手期清光倚

玉樹

馮宿

宿字拱之婺州人爲裴度彰義判官徐州張建封掌書記歷工刑二侍郎
尹河南樂天夢得以詩送之宿酬云共稱洛邑難其選何幸天書用不才
遙約和風新草木且令新雪靜塵埃臨歧有愧傾三省別酌無辭醉百杯
明歲杏園花下集須知春色自東來

每春嘗接諸
公杏園宴會

柳宗元

種柳戲題云柳州柳刺史種柳柳江邊談笑爲故事推移成昔年垂陰當
覆地聳幹會參天好作思人樹慙無惠化傳

南澗中題云秋氣集南澗獨遊亭午時迴風一蕭瑟林影久參差始至若
有得稍深遂忘疲羈禽響幽谷寒藻舞淪漪去國魂已遠懷人淚空垂孤
生易爲感失路少所宜寂寞竟何事徘徊祇自知誰爲後來者當與此心
期

漁翁云漁翁夜傍西巖宿曉汲清湘然楚竹煙銷日出不見人款乃一聲
山水綠迴看天際下中流巖上無心雲相逐

子厚與楊惠之書云吾年十七求進士四年乃得舉二十四求博學宏詞

二年乃得仕及為藍田尉走謁大官堂下與卒伍為列益學老子和光同

塵雖自以為得然已得號為輕薄人矣及為御史郎官自以登朝利害益

大雖戒礪益切卒不免為連累廢逐子厚陷王叔文之黨遷謫卒死於柳州柳人立廟羅池

雪詩云千山鳥飛絕萬徑人蹤滅孤舟簑笠翁獨釣寒江雪視鄭谷亂飄僧舍之句不

倅矣東坡居士云

子厚死三年愚溪無復曩時矣劉夢得聞之賦三絕云溪水悠悠春自來

草堂無主燕飛迴隔簾惟見中庭草一樹山榴依舊開其草聖數行留壞

壁木奴千樹屬鄰家惟見里門通德榜殘陽寂寞出樵車其柳長竹巷依

依在野草青苔日日多縱有隣人解吹笛山陽舊侶更誰過其三

吳武陵

貢院樓北新栽小松詩云拂檻愛貞容移根自遠峰已從芳草沒終不任

苔封葉小初凌雪鱗生欲狀龍承春濯雨露得地近垣墉逐吹香微動含

煙色漸濃時迴日月照爲謝小山松

武陵有文而强悍嘗爲韶州刺史賊罪狼籍勅令廣州幕吏鞠之科第少年殊不假貸持之頗急武陵不勝其忿題詩路左佛廟云雀兒來逐颺風高下視鷹鷂意氣豪自謂能生千里翼黃昏依舊委蓬蒿尋貶播州司戶卒時太和八年也或云李渤爲桂管觀察吳爲副因宴大醉渤命衛校米蘭梟之明日乃悟其太過釋之故武陵詩云

武陵信州人爲太學博士太和初薦杜牧於崔郾牧第五人登第初李愬節度唐鄧武陵薦李景儉王湘健智沈敏可表以自副時號知人

邵眞

尋人偶題云日昃不復午落花難歸樹人生能幾何莫厭相逢遇

眞爲李寶臣成德軍掌書記後從李惟岳之叛岳與田悅李正己拒命眞諫之惟岳寤使眞作奏復爲將吏所沮德宗詔張孝忠朱滔合兵討惟岳大敗之悅嬰城惟岳召眞議歸順悅遣扈岌來責惟岳且欲斬眞惟岳懼斬眞以謝焉其後王武俊表其忠贈戶部尙書

崔膺

感興云富貴難義合困窮易感恩古來忠烈士多出貧賤門世上桃李樹
但結繁華子白屋抱關人青雲壯心死本以勢利交勢盡交情已如何失
勢後始歎門易軌

膺博陵人性狂少長於外家不齒及長能文作道旁孤兒歌以諷外家張
建封愛其才以爲客夜中大叫驚軍衆欲食其肉建封藏之明日置宴監
軍曰某有請請崔膺建封曰如約逡巡建封又曰某亦有請卻請崔膺坐
中皆笑乃獲免

別佳人云隴上流泉隴下分斷腸嗚咽不堪聞嫦娥一入月中去巫峽千

秋立白雲

或云崔
涯詩

李涉醉中贈膺詩云與君兄弟匡嶺故與君相逢揚子渡白浪南分吳塞
雲綠楊西入隋宮路隋家文物今雖改舞館歌舞基尙在煬帝陵邊草木
深汴河流水東歸海今古悠悠人自別此地繁華終未歇大道青樓夾翠

煙瓊幄繡帳開明月與君一言兩相許外捨形骸中爾汝揚州歌酒不可
追洛神映箔湘妃語白馬黃金爲身置誰能獨美他人醉暫到香爐一夕
閒能展愁眉百年事君看白日光如箭一度別來顏色變早謀侯印佩腰
間莫遣看花鬢如霰

衛象

古詞云鵲血凋弓溼未乾鷓鴣新染劍花寒遼東老將鬢成雪猶向旄頭
夜夜看

傷李端云才子浮生促泉台此路賒官卑揚執戟年少賈長沙人去門棲
鵬灾成酒誤蛇惟餘封禪草留在茂陵家

段成式云大曆末禪師元鑒住荊州陟岵寺道高有風韻人不可得而親
張璪嘗畫松於齋壁符載贊之象詠之時號三絕悉加聖焉人問之曰無
事疥吾壁也其徒有殺物命者弗之責有高行者亦不稱或怪之乃題詩
於竹曰大海從魚躍長空任鳥飛乃知象大曆間江陵詩人也

李宣遠

并州路作云秋日并州路黃榆落照閒孤城吹角罷數騎射鵬還帳幕遙
臨水牛羊自下山征人正垂淚烽火起雲間

近無西耗云遠戎兵壓境遷客淚橫襟烽火驚秦塞囚居困越吟自憐牛
馬走未識犬羊心一月無消息西看日又沈

遠貞元進士登第

熊孺登

至日荷李常侍過郊居云賤子守柴荆誰人記姓名風雲千騎降草木一
陽生禮異江河動歡殊里巷驚稱觴容侍坐看竹許同行遇覺滄溟淺恩
疑太岳輕盡搜天地物無諭此時情

和竇中丞歲酒喜見小男兩歲云更添十歲應爲相歲酒從今把未休聞
得一毛添五色眼看相逐鳳池頭

劉夢得送襄陽熊判官孺登罷歸鍾陵因寄江西裴中丞詩云射策志未

就從事府云除篋留馬卿賦袖有劉弘書忽見夏木陰悵然憶吾廬復持
州民刺歸謁專城居

樂天洪州逢孺登詩云靖安院裏辛夷下醉笑狂吟氣最麤莫問別來多
少苦低頭看取白髭鬚

孺登重陵人登進士第終於藩鎮從事

崔立之

南至日隔仗望含元殿香爐詩云千官望長至萬國拜含元隔仗爐光出
浮霜煙氣翻飄飄縈內殿漠漠澹前軒聖日開如捧卿雲近欲渾輪困洒
宮闕蕭索散乾坤願倚天風便披香奉至尊

退之贈崔立之評事詩云崔侯文章苦捷敏高浪駕天輸不盡曾從關外
來上都隨身卷軸車連軫朝爲百賦猶鬱怒暮作千詩轉適緊詩意殊憫
其窮

立之登貞元進士第

郭遵

南至日隔仗望含元殿香爐詩云冕旒親負屐卉服盡朝天陽谷移初日
金爐出御煙芬馨流遠近散漫入貂蟬霜仗凝餘白朱欄映轉鮮如看浮
闕在稍覺逐風遷爲沐皇家慶來瞻羽衛前一作裴次元
遵登貞元進士第

韋紆

南至日隔仗望含元殿香爐云抗殿疏元首高高接上玄節當南至日星
是北辰天寶戟羅仙仗金爐引瑞煙霏微雙闕麗溶洩九州連拂曙祥光
滿分晴曉色鮮一陽今在曆生植願陶甄一作王良士
紆貞元進士也

唐詩紀事卷第四十四

王建

王建宮詞百首

蓬萊正殿壓金鰲紅日初生碧海濤開著五門遙北望柘黃新帕御牀高

帕一作鏡

殿前傳點各依班召對西來六詔蠻上得青花龍尾道側身偷覷正南山
龍煙日暖紫瞳瞳宣政門當玉殿風五刻閣前卿相出下簾聲在半天中
白玉窗前起草臣櫻桃初赤賜嘗新殿頭傳語金階遠只進詞來謝聖人
內人對御疊花牋繡坐移來玉案邊紅蠟光中呈草本平明昇出閣門宣

光中一作燭前

千牛仗下放朝初玉案傍邊立起居每日進來金鳳紙殿頭無事不教書
延英引對碧衣郎江硯宣毫各別牀天子下簾親考試宮人手裏過茶湯

此詩亦云元稹作

唐詩紀事

事

卷第四十四

一

無錫丁氏校刊

未明開著九重關金畫黃龍五色幡直到銀臺排仗合聖人三殿對西番
少年天子重邊功親到凌煙畫閣中教覓勳臣寫圖本長將殿裏作屏風
丹鳳樓門把火開五雲金輅下天來堦前走馬人宣慰天子南郊一宿回
樓前立仗看宣赦萬歲聲長拜舞齊日照彩盤高百尺飛仙爭上取金雞
集賢殿裏圖書滿點勘頭邊御印同真跡進來依數字別收鎖在玉函中

依數字
作知數字

祕殿清齋刻漏長紫微宮女夜焚香拜陵日近公卿發鹵簿分頭出太常

出一
作入

新調白馬怕鞭聲供奉騎來遶殿行爲報諸王侵早入隔門催進打毬名
對御難爭第一籌殿前不打背身毬內人唱好龜茲急天子鞞回過玉樓

鞞一
作措

新衫一樣殿頭黃銀帶排方獼尾長總把玉鞭騎御馬緣鬘紅額麝煙香
羅衫葉葉繡重重金鳳銀鵝各一叢每徧舞頭分兩向太平萬歲字當中

魚藻宮中鎖翠娥先皇行處不曾過如今池底休鋪錦菱角雞頭積漸多
殿前明日中和節連夜瓊林散舞衣傳報所司分蠟燭監開金鎖放人歸
五更三點索金車盡放宮人出看花仗下一時催立馬殿頭先報內園家
城東北面望雲樓半下珠簾半上鉤騎馬行人長速過恐防天子在樓頭
射生宮女宿紅妝把得新弓各自張臨上馬時齊賜酒男兒跪拜謝君王
新秋白兔大於拳紅耳霜毛趁草眠天子不教人射殺玉鞭遮到馬蹄前
內鷹籠脫解紅條鬥勝爭飛出手高直上碧雲還卻下一雙金爪菊花毛

菊一作柳

競渡船頭掉采旗兩邊濺水溼羅衣池東爭向池西岸先到先書上字歸
燈前飛入玉堦蟲未臥常聞半夜鐘看著中元齋日到自盤金綫繡眞容
步行送入長門裏不許來辭舊院花只恐他時身到此乞恩求赦放還家

乞恩求赦一作乞求自在

一時起立吹簫管得寵人來滿殿迎整頓衣裳皆著卻舞頭當拍第三聲

琵琶先抹六幺頭小管丁甯側調愁半夜美人雙唱起一聲聲出鳳皇樓

唱起一作起唱

春池日暖少風波花裏牽船水上歌遙索劍南新樣錦東宮先釣得魚多
十三初學擘箜篌弟子名中被點留昨日教坊新進入並房女宮與梳頭
紅蠻桿撥貼胸前移坐當頭近御筵用力獨彈金殿響鳳皇飛出四條弦

出一作下

春風吹雨灑旗竿得出深宮不怕寒誇道自家能走馬團中橫過覓人看

團一作園

粟金腰帶象牙錐散插紅翎玉突枝旋獵一邊還引馬歸來雞兔遶鞍垂
雲駝花驄各試行一般毛色一般纓殿前來往重騎過欲得君王別賜名
每夜停燈熨御衣銀熏籠底火霏霏遙聽帳裏君王覺上直鐘聲始得歸
因喫櫻桃病放歸三年著破舊羅衣內中人識從來去結得金海上貴妃

破一作盡人識從來去一作侍從來還去

欲迎天子看花去下得金堦卻悔行恐見失恩人舊院回來憶著五弦聲
往來舊院不堪脩近勅宣徽別起樓聞有美人新進入六宮未見一時愁
自誇歌舞勝諸人恨未承恩出內頻連夜宮中脩別院地衣簾額一時新
悶來無處可思量旋下金堦旋憶牀收得山丹紅藥粉鏡前洗卻麝香黃
縑羅不著索輕容對面教人染退紅衫子成來一徧出明朝半片在園中
合暗報來門鎖了夜深應別喚笙歌房房下著珠簾睡月過金階白露多
御厨不食索時新每見花開卽苦春白日臥多嬌似病隔簾教喚女醫人
薰薰洗手遶金盆旋拭紅巾入殿門衆裏遙拋新摘子在前收得便承恩

新摘子作
金橘子

御池水色春來好處處分流白玉渠密奏君王知入月喚人相伴洗裙裾
移來女樂部頭邊新賜花檀木五弦纒得紅羅手帕子當心細畫一雙蟬
新晴草色綠溫暾山雪初消漸出渾今日踏青歸校晚傳聲留著望春門

漸出一
作灑水

唐詩

紀事

卷第四十四

三

無錫丁氏校刊

兩樓相換珠簾額中尉明朝設內家一樣金盤五千面紅酥點出牡丹花
舞送香毬出內家記巡傳把一枝花散時各自燒紅燭相逐行歸不上車

舞送香毬一作盡送春來

家常愛著舊衣裳空插紅梳不作妝忽地下堦裙帶解非時應得見君王
宣勅教歌不出房一聲一徧奏君王再三博士留殘拍索向宣徽作徹章

宣別一作

行中第一爭先舞博士傍邊亦被欺忽覺管絃偷破拍急翻羅袖不教知

偷先一作

私縫黃帔捨釵梳欲得金仙觀裏居近被君王知識字收來案上檢文書
月冷江清近臘時玉階金瓦雪澌澌浴堂門外抄名入公主家人謝面脂

月冷江清一作日冷天晴

未承恩澤一家愁乍到宮中憶外頭求守管弦聲款逐側商調裏唱伊州

求守管弦聲款逐側商調裏唱伊州一作新學管弦聲尚澀

東風潑火雨新休，昇盡春泥掃雪溝。走馬犢車當御路，漢陽公主進雞毬。

進謝一作

風簾水閣壓芙蓉，四面鉤欄在水中。避熱不歸金殿宿，秋河織女夜妝紅。

作妝一作燈

聖人生日明朝是，私地教人屬內監。自寫金花紅榜子，前頭先進鳳皇衫。
避暑昭陽不擲盧，井邊含水噴鷓鴣。內中數日無呼喚，搦得滕王蛺蝶圖。
內宴初秋入二更，殿前燈火一天明。中宮傳旨音聲散，諸院門開觸處行。
玉蟬金雀三層插，翠髻高叢綠鬢虛。舞處春風吹落地，歸來別賜一頭梳。
樹葉初成鳥護窠，石榴花底笑聲多。衆中遺卻金釵子，拾得從他要贖麼。

護一作出贖
麼一作賞羅

小殿初成粉未乾，貴妃姊妹自來看。爲逢好日先移入，續向階西索牡丹。

作階一作街

內人相續報花開，准擬君王便看來。逢著五絃琴繡袋，宜春院裏按歌回。

唐詩紀事

卷第四十四

四

無錫丁氏校刊

巡吹慢徧不相和暗數看誰曲較多明日梨花園裏見先須逐得內家歌
黃金合裏盛紅雪重結香羅四出花一一傍邊書勅字中官送與大臣家
末明東上閣門開排仗聲從後殿來阿監兩旁相對立遙聞索馬一時回
宮人早起笑相呼不識堦前掃地夫乞與金錢爭借問外頭還似此閒無
小隨阿姊學吹笙見好君王賜與名夜拂玉牀朝把鏡黃金殿外不教行
日高殿裏有香煙萬歲聲長動九天妃子院中初降誕內人爭乞洗兒錢
宮花不共外花同正月長先一半紅供御櫻桃看守別直無鴉鵲到園中
殿前鋪設兩邊樓寒食宮人步打毬一半走來爭跪拜上棚先謝得頭籌
大儀前日暖房來囑向昭陽乞藥栽勅賜一窠紅躑躅謝恩未了奏花開
御前新賜紫羅襦步步金堦上輿與宮局總來爲喜樂院中新拜內尙書

步
作不步
下

鸚武誰教轉舌關內人手裏養來姦語多更覺承恩澤數對君王憶隴山
分朋閒坐賭櫻桃收卻投壺玉腕勞各把沈香雙陸子局中鬥累阿誰高

禁寺紅樓內裏通笙歌引駕夾城東裏頭宮監堂前立手把牙鞘竹彈弓

宮監堂前一
作蕃女簾前

春風院院落花堆金鎖生衣掣不開更樂歌臺起妝殿明朝先進畫圖來
舞來汗溼羅衣徹樓上人扶下玉梯歸到院中重洗面金花盆裏潑銀泥
宿妝殘粉未明天總立昭陽花樹邊寒食內人長白打庫中先散與金錢
衆中先得君王笑偷把金箱筆硯開書破紅蠻隔子上旋推當直美人來

推一作催
笑一作喚

教徧宮娥唱徧詞暗中頭白沒人知樓中日日歌聲好不問從初學阿誰
後宮宮女無多少盡向園中笑一團無蝶落花相覓著春風共語一應難

一作花蕊
夫人詩

青樓小婦研裙長總被抄名入教坊春設殿前多隊舞朋頭各自請衣裳

青樓一
作黛眉

水中芹葉土中花拾得還將避衆家總待別人般數盡袖中拈出鬱金牙

一作艾心芹葉初生小祗門
時新不鬥花別人作大家

玉簫改調箏移柱催換紅羅繡舞筵未戴柘枝花帽子兩行宮監在簾前
窗窗戶戶院相當總有珠簾玳瑁牀雖道君王不來宿帳中長是炷牙香

長是炷牙香一
作長下花香囊

兩入珠簾滿殿涼避風新出玉盆湯內人恐要秋衣著不住熏籠換好香
金吾除夜進讎名畫袴朱衣四隊行院院燒燈如白日沈香火底坐吹笙
樹頭樹底覓殘紅一片西飛一片東自是桃花貪結子錯教人恨五更風
金殿當頭紫閣重仙人掌上玉芙蓉太平天子朝迎日五色雲車駕六龍
紅燈睡裏喚春雲雲上三更直宿分金砌雨來行步滑兩人擡起隱花裙

雲上一
作月上

蜂鬚蟬翅薄鬆鬆浮動搔頭似有風一度出時拋一徧金條零落滿函中
忽地金輿向月陂內人接著便相隨卻回龍武軍前過當處教開臥鴨池
畫作天河刻作牛玉梭金鑷采橋頭每年宮裏穿針夜勅賜諸親乞巧樓

春來睡困不梳頭，懶逐君王苑北游。暫向玉花階上坐，簸錢贏得兩三籌。
彈棋玉指兩參差，背局臨虛鬪著危。先打角頭紅子落，上三金字半邊垂。
宛轉黃金白柄長，青荷葉子畫鴛鴦。把來不是呈新樣，欲進微風到御牀。
供御香方加減頻，水沈山麝每回新。內中不許相傳出，已被醫家寫與人。
藥童食後送雲漿，高殿無風扇少涼。每到日中重掠鬢，袂衣騎馬繞宮廊。
建初爲渭南尉，值內官王樞密者，盡宗人之分。然彼我不均，復懷輕謗之
色。忽過飲語及漢桓靈信任中官起黨，錮興廕之事。樞密深憾其譏，乃曰：
吾弟所作宮詞，天下皆誦於口。禁掖深邃，何以知之？建不能對，後爲詩以
贈之。乃脫其禍。建詩曰：先朝行坐鎮相隨，今上青宮見長時。脫下御衣偏
得著，進來龍馬每教騎。常承密旨還家少，獨對邊情出殿遲。不是當家頻
向說，九重爭遣外人知。

上李庶子云：紫煙樓閣碧沙亭，上界詩仙獨自行。奇險驅回還寂寞，雲山
經用始鮮明。藕綃紋縷裁來滑，鏡水波濤濾得清。昏思願因秋露洗，幸容

階下禮先生

建赴陝州司馬樂天夢得以詩送之夢得詩云暫輟清嚴出太常空攜詩
卷赴甘棠府公既有朝中舊司馬應容酒後狂案牘來時唯暑字風煙入
興便成章兩京大道多游客每遇詞人戰一場樂天詩云陝州司馬去何
如養靜資貧兩有餘公事閒忙同少尹俸錢多少敵尙書只攜美酒閒爲
伴惟作新詩趁下車自有鐵牛無詠者計君投刃必應虛

張籍贈建詩云早在山東聲價遠曾將順策佐嫖姚識來詩句無閒語老
去官班未在朝身屈只聞詞客說居貧多見野僧招獨從詩閣歸來晚春
水橋邊看柳條

建大曆進士爲昭應丞太府寺丞終於司馬建在昭應楊巨源寄詩云武
皇金輅輾香塵每歲朝元及此辰光動泉心初浴日氣蒸山腹總成春謳
歌已入雲韶曲詩賦方歸侍從臣瑞靄朝朝猶望幸天教赤縣有詩人

唐詩紀事卷第四十四